

四庫全書

集部

欽定四庫全書

元文類卷四十一

元 蘇天爵 編

雜著

禮典總序

於皇有元應天順人功成治定迺稽古經國施和萬民
惟帝中興禮樂大備粲然成方垂則後世夫制禮自邇
覃遠由親暨疏朝覲會同以正大位以統百官以馭天
下錫賚燕饗以睦宗戚以親大臣以裸賓客天下既定

弗敢怠寧故行幸以時君臨萬邦在器與名故通信以
瑞節辨等以興服定律作樂治厯明時何以守成求聞
帝王之訓以崇德何以新民率循聖賢之學以設教勵
學以經行而賓興其賢能廣聽於芻蕘以通徹其壅蔽
討論潤色藝文修矣厚往薄來遠人柔矣天道弗遠示
君以事故度德以應禎祥修已以弭災變而人道備矣
是以道合于天德涵乎地仁義孚于民然後可以享上
帝事祖宗通乎上下之祀而無愧生榮死哀極乎幽明

之變秘科內典悉其祀禱之方而鬼神之情見矣考諸
行事厥有成績作禮典上中下篇一曰朝會二曰燕饗
三曰行幸四曰符寶五曰輿服六曰樂七曰厯八曰進
講九曰御書十曰學校十有一曰藝文十有二曰貢舉
十有三曰舉遺逸十有四曰求言十有五曰進書十有
六曰遣使十有七曰朝貢十有八曰瑞異為禮典上篇
一曰郊祀二曰宗廟三曰社稷四曰岳鎮海瀆五曰三
皇六曰先農七曰宣聖廟八曰諸神祀典九曰功臣祠

廟十曰諡十有一曰賜碑十有二曰旌表為禮典中篇
一曰釋二曰道為禮典下篇蓋國家典禮朝會以尊君
治人之道也郊廟以禋祀事神之道也佛氏為教超乎
神人之表所以輯福于國家民庶者也故各為一篇之
首

朝會

國朝凡大朝會后妃宗王親戚大臣將帥百執事及四
方朝附者咸在朝會之信執禮之恭誥教之嚴詞令之

美車馬服用之別牲齊歌樂之辨寬而有制和而有容
貴有所尚賤無不逮固已極盛大於當時矣世祖皇帝
建國紀元始命議禮考文思兼古帝王之事粲然成一
代典章以垂無窮焉

燕饗

國有朝會慶典宗王大臣來朝歲時行幸皆有燕饗之
禮親疎定位貴賤殊列其禮樂之盛恩澤之普法令之
嚴有以見祖宗之意深遠矣與燕之服衣冠同制謂之

金定四庫全書
卷四十一
質孫必上賜而後服焉

行幸

皇朝建國之初四征不庭靡暇安處世祖皇帝定兩都
以受朝貢備萬乘以息勤勞次舍有恒處車廬有恒治
春秋有恒時遊畋有度燕享有節有司以時供具而法
寓焉此安不忘危貽子孫萬世之法者也故列聖至于
今率修而行之

符寶

古者合信於天下皆用玉焉至秦得和氏璧刻為皇帝璽後有天下者傳之為寶或不得則倣而作之噫天命有德何有於秦璽哉我朝懲歷代之謬雖得秦刻及前世之跽皆藏而弗用爰製大寶質兼金玉之貴文別古今之宜以成一代之制度典瑞掌之爰述其目凡軍符驛券諸侯王百司印章附焉

輿服

聖朝輿服之制適宜便事及盡收四方諸國也聽因其

俗之舊又擇其善者而通用之世祖皇帝立國建元有朝廷之盛百官之富宗廟之美考古昔之制而製服焉如冕舄之制祭祀則用之旂常之章朝會則用之至英宗皇帝始置鹵簿於是乎儀衛兼備矣

樂

樂也者聲文之著者也國家樂歌雄偉宏大足以見興王之盛焉郊社宗廟孔子之廟先農之壇用古樂朝會燕饗用燕樂於是古今之音備矣

歷

欽天授時帝典先焉我世祖皇帝混一區夏首徵名儒
作授時歷為仰儀簡儀及諸儀表創物之智有古人未
及為者於是測景之所東極句麗西至滇池南踰朱厓
北盡鐵勒凡二十有七是亦古所未備者也其為法多
采唐一行之議主於隨時考驗以與天合則無前代沿
襲傳會之弊此亦古所未能用者也豈非真元會合宇
宙一初之徵歟昔在太宗皇帝時中書耶律楚材嘗為

庚午元厯足以見國初彌綸天地之事者已如此今西域亦有厯官國家參用之

進講

國初嘗求儒者於兵間已有問道考治之意世祖之在潛藩也盡收亡金諸儒學士及一時豪傑知經術者而顧問焉論定大業厥有成憲在位三十餘年凡大政令大謀議諸儒老人得以經術進言者可考而知也厯朝因之至我欽天統聖至德誠功大文孝皇帝始開奎章

閣陳祖宗之遺訓考經史之格言以養德性以成事功而文治大興矣

御書

日月之縣象雲漢之為章星辰之經緯皆天之文也及夫河出圖洛出書則有以通神明之德類萬物之情豈非造化之緼至是而著明歟天子言而為訓誥誓命行而為禮樂典章何往而非文也至於萬幾之暇親御翰墨則刻之琬琰焜耀來世亦猶天之所為其惟圖書乎

我國家自世祖皇帝爰擇名儒以傳東宮是故裕宗皇帝之在春坊嘗有日習倣書藏之東觀以示子孫迨夫仁宗皇帝英宗皇帝時有宸翰寵賜羣臣傳至欽天統聖至德誠功大文孝皇帝則辭意之粹書法之聖度越前代帝王矣猗歟盛哉

學校

古之有國家者設庠序學校以教其民申孝弟之義導仁義之方所以扶植三綱五常之道也故自王宮國都

至于閭巷莫不有學秦漢以降率是而行之則治違是而廢之則否明效大驗不可誣也我朝自太宗皇帝投戈講藝建學于燕四方諸侯相繼興學迨夫世祖皇帝之在潛邸也故金進士元好問啟請為儒教大宗師作其即位以道建極文軌混同內設胄監外設提舉官以領郡縣學校之事於是遐邇絕漠先王聲教之所未暨者皆有學焉至元八年頒行國字又設蒙古字學視儒學而加重自時厥後書院精舍月益歲增及夫大司農

之立則一鄉一社皆有學矣列聖相承百年之間幅員萬里黌舍相望何其盛也而我欽天統聖至德誠功大文孝皇帝又設置授經郎于奎章閣之下以教近臣貴戚子弟之幼者數學自貴近始天下有不感化者乎外是醫藥卜筮之流亦皆有肆習之所則名一藝者咸精其能矣若稽周官鄉大夫之教屬地官大司樂之教屬春官今國都郡邑之學載禮典鄉社之學則賦典具存云

藝文

我國家文學之盛上古聖賢以來諸儒經傳之學史官載之書其主典之官則有翰林國史集賢等院祕書國子等監而律歷陰陽醫卜之事竺乾之教老莊之說又各有其人焉民間之書尚多也自我朝之所作者製國字以通語言文字於萬方述國制以示禮樂刑政於天下至若奎章之建閣斷自宸衷緝熙聖學表章斯文所謂唐虞之際於斯為盛矣夫

貢舉

以科目取賢能之士歷周漢至于唐以來其目多矣我
太宗皇帝既取中原即行試選取士之法至元中嘗議
行進士科歷大德至大皆有議而未及行仁宗皇帝始
以獨斷行之如茂異神童之科有則舉之非若進士科
之有定額也而亦附見焉

舉遺逸

國家取人之途多矣其有為有能之士或不肯自售朝

廷以禮徵聘而起之高爵厚祿以待之是以貪夫廉薄夫敦鄙夫寬懦夫有立志者用此道也以遺逸舉者百餘年間尚多有之而簡牘殊不備書有徵者以啟其端

求言

昔者芻蕘之言聖人擇焉我國家來言者以達下情言苟不當亦不加罪著在令甲其內外臣僚章疏語在治典中禮曹職掌封事甚衆朝廷數使治擇而采用之俟其成編則取而載之此

進書

工執藝事各進其技因以得官者蓋有之矣能文之士以其所作來獻朝廷許之噫道成而上藝成而下君子亦兼取焉

遣使

昔我國家之臨萬方也未來朝者遣使喻而服之不服則從而征伐之事在政典此記使事而已天下既定郡縣既立有所詢問考察則遣使致命遐遠則遣使皆事

已而罷彙有司之存牘為此篇

朝貢

我國家幅員之廣極天地覆燾自唐虞三代聲教威力所不能被者莫不執玉貢琛以修臣職於是設官治館以待之梯山航海殊服異狀不可勝紀案牘不具不得備書立此篇以俟考補

瑞異

古人有災異則謹書之所以儆天戒而思患豫防也而

祥瑞或缺不書者恐善佞者之生侈心焉今災祥並置以考休咎之徵故簡牘有存者悉書之

右禮典上篇凡十有八目

郊祀

惟天子得祭天古之制也我國家建大號以臨天下自有拜天之禮衣冠尚質祭品尚純帝后親之宗戚助祭率其世職非此族也不得與焉報本反始出於自然而非強為之制者也有司簡牘可知者憲宗皇帝始拜天

於日月山既而又用孔子孫元措言祭昊天皇后土始大合樂世祖皇帝至於今制度彌文而國家之舊禮初不廢也

宗廟

國初祭享之禮祖宗自有成法世祖皇帝中統元年秋七月祀祖宗于中書省三年因建太廟于燕京四年冬十有一月有事于太廟至元十七年作太廟于大都更定室次歲有恒祀武宗皇帝始親享英宗皇帝更作新

廟始製鹵簿御袞冕行裸獻今上中興先見廟而後即位親祀之禮史不絕書宜乎克戡大難身致隆平規模宏遠矣

社稷

古者有人民則置社稷至元二十九年始用御史中丞崔彧言以明年正月營社稷於和義門內少南以春秋仲月上戊致祀牲牢鬯幣三獻之禮八成之樂亞於郊廟之隆矣郡縣之祀風雨雷師皆附見焉

嶽鎮海瀆

古者有事於方岳天子親之其在諸侯封內者則諸侯亦各得祀之秦漢之後嶽鎮海瀆全歸職方氏之時蓋鮮我國家混一名山大川咸在封域之內自世祖皇帝累降明詔以次加封歲時遣使禮焉

三皇

三皇配天立極有國家者載諸祀典禮亦宜之我國家通祀於天下祭儀畧倣孔子之廟歲以春秋二季行事

而以醫者主之

先農

國家既得中原始立勸農司又置大司農專領耕桑之事歲有所報於先農則其官主之請于天子而行事焉

宣聖廟

有國家者通祀仲尼於天下其來尚矣我國家定中國廟祀如故而學隸焉舟車所至凡置郡縣之地無小大莫不皆有廟學其重者京師有國學之建東魯有闕里

之祠至於褒封聖門之重崇撫儒者之勤尤為盛大矣

諸神祀典

神明之祀必因山川之形氣或有功德於人民可以禦災患可以立名教者則載之祀典非禮之禮不淫則諂在王政所宜禁者矣

功臣祠廟

古者諸侯有國大夫有家則有廟以祭其祖考功臣之立廟雖諸葛武侯之於蜀漢猶有所不許焉後世宗法

不行諸侯大夫之家無廟以祭幾於忘其先矣我國家
一二大勲勞之臣賜之廟而使之祭皆異數云

諡

諡以易名所以定論平生也而羣臣之諡善惡具在今
善者多得諡而惡者無與立諡焉

賜碑

昔之有大勲勞於國家者勒之鼎彝以勸臣庶以示其
子孫後世伐石紀功以文其出自上旨者皆異恩也其

事具天官臣事茲著其目焉

旌表

詩云天生烝民有物有則民之秉彝好是懿德夫孰無秉彝好德之心哉有國家者立為法制使愚不肖者有所觀感庶乎企而及之勉強以從之故有忠臣孝子義夫節婦之目以風示天下我朝教育之久有司上于禮部者無虛日旌異之書幾徧海內可不謂之盛治哉

右禮典中篇凡十有二目

釋

佛氏之學其言以涵弘廣大為宗我國家思以至仁大
慈覆燾萬物利益羣有是以崇尚其教而敬禮之日盛
月益大抵為宗社生靈計也其事攷而得之者悉載於
篇以冠禮典丙卷之首

道

道家者流以清淨為宗禴禘禘其末也太祖初有全
真丘處機者亦勸上以好生止殺之事中原之人至今

稱道之此道之一門也其他如正一大道之類皆有所因起其事有關於朝廷者則錄之

右禮典下篇凡二目

政典總序

天生五材兵能撥亂軒轅之興其戰七十征頑伐鬼代不絕書惟我國家光受貞符二祖三宗經營大業天戈攸及無遠不庭成廟以來敷文享成邊垂乂安間有小警德明德威尋致敕寧若創與守度越前古編之簡冊

焜耀無極是作政典其類二十其帙百二十三

凡天下事其統有宗貫鏹挈裘以索以領作目錄一卷
天造草昧西東梗阻式渙其羣以一萬有作征伐第一
末盜遐夷潢池倔強蝨蚤奚拔道蕪畏懷作招捕第二
籍各編伍憲度以申踐更調發觀若畫一作軍制第三
刁斗靈姑干戚斧鉞橐兕函矢皆軍之用作軍器第四
作息進退齊之實難乃立之師示以成式作教習第五
罷久益弊習久益忘俾陳在列視其臧否作整點第六

有能勤事以死樹功高爵厚祿用錫其成作軍賞第七
怠惰亡命賊事敗衆待爾以何刁鋸鞭扑作責罰第八
周廬徼巡前後左右居重馭輕以臨天下作宿衛第九
大君之心天下一家思保億兆皆如王宮作屯戍第十
勞則思善興建是役且寬三農俾專南畝作工役第十
一爾病我藥我振爾乏沐浴膏澤歌詠勤苦作存恤第
十二看來叢脞紛瑣無歸取不可門棄之弗備作兵雜
錄第十三屯田軍食馬牧軍資獵以合圍斯寓軍政驛

郵騶邏皆有卒名非兵而兵故悉附見作馬政第十四
屯田第十五驛傳第十六弓手第十七急遞第十八祇
從第十九鷹房捕獵第二十終焉

征伐

平宋

國家既踣金遂與宋鄰歲有疆場之事天啟列聖方事
開拓宋德日衰權姦擅命土隳人貳曾不知警迨世祖
即祚拘我好使郝經結我叛臣李璫天子震怒是以有襄陽

之役文煥送款

呂文煥

亡徵具矣而直我神聖興王之運

驅豪傑攬羣策

颶

逐霆旬三道鼓行

至元十一年七月左丞相巴延奉詔

南征九月一日巴延與火天澤合師襄陽分軍為三道巴延引大軍水陸趨郢州招討使翟某以兵一萬由西路老鴉山趨荆南府索多以兵一萬由東路棗陽掠司空山前茅破竹中堅握機於

是斲沙陽新城

十月二十二日大軍至沙陽城下令黑楊總管招降城上不肯與之語復使一

俘持黃榜及檄文且傳郢州都統趙文義首入城招之其守將串樓王總管者斬俘焚黃榜其部官傅益乘一舟引軍十七人來降續又降軍船七艘王總管斬益軍之欲降而未及者日暮我軍立砲二十三日參政呂文煥至城下諭之使降弓弩亂發乃水陸並進軍中有李國用者能祭風風大作砲手張元帥等順風掣金汁火

欽定四庫全書

元文類

十七

砲入城燒屋舍烟焰燎天城遂破生擒串樓王等四人
餘悉斬之沙陽南五里為新城其將曰邊都統二十四
日參政呂文煥至城下招諭城上人不肯酬答流矢亂
下二十五日巴延等過江令特穆爾史達爾罕二人詣
城下招之列沙陽所斬首及縛串樓王等令望城呼邊
都統宜早降不然禍在目下又射黃榜及文檄入城中
入遣人招邊都統曰請呂參政與語文煥騎馬至城下
飛矢如雨中文煥右臂奔還二十六日總制黃順來降
二十七日令順赴城下呼城上軍其部曲即縋城欲下
邊都統邀截入城當門斬之統副任寧又來降遂引軍
據其周圍堡寨復使人招於城下邊都統不言但以火
砲石砲弓弩箭鏊俱發於是水陸並進立砲發弩登雲
梯登城攻破邊都統自焚廩陽羅至蔡店巴延大會親
死串樓王等四人亦併誅

將議渡江遣總管劉深千戶馬福觀沙湖水勢令諸將
皆趨漢口諸將曰漢口水急且有備不若由淪河轉取

沙燕口以入大江巴延遣覘沙燕口宋將夏貴堅守其
勢難犯巴延乃圍漢陽軍陽言取漢口渡江貴果出精
兵數千援漢陽併力守禦巴延遣萬戶阿勒哈率騎兵
倍道趨沙燕口襲據之十二月九日大軍自漢口開壩
引船入淪河轉沙燕口達於大江十日巴延以戰艦萬
計相踵而至先令數千艘泊於江岸北屯布蒙古漢軍
旌旗彌望宋人奪氣夏貴率漢鄂舟師彌亘三十餘里
迎敵至夜貴潛發兵犯我師軍船總管張當戰卻之是
日令諸將修攻具進陽羅堡十一日詰旦遣人宣布朝
廷威德招諭陽羅將士弗聽十二日又遣人敷陳禍福
宋將士曰我輩受大宋重恩戮力死報此其時也安有
叛逆歸降之理備吾甲兵決之今日巴延遂指揮諸將
進攻不克十三日復攻陽羅堡巴延密謀於阿珠曰宋
人之心謂我必拔此堡方能渡江此堡堅攻之徒勞苦
今夜汝以鐵騎三十汎舟泝視上流陣必不堅當為擣
虛之計以來日絕早渡襲南岸苟得過速遣人報我阿

珠亦曰攻城乃下策若分軍船之半循岸西上泊青山磯下伺隙擣虛可以得志遂以昏時遡流二十餘里泊青山是夜雪大作夜半遙見南岸多露沙洲即率部曲徑渡載馬後隨宋將程鵬飛拒戰江中阿珠橫身盪決蹀血中流禽都統高邦顯房某死者無算得船千餘艘阿珠登沙洲急擊攀岸沙關開而復合者幾四敵小卻萬戶史弼鼓勇而戰遂得南岸諸將出馬苦鬪破之追殺至鄂南門宋人敗走十四日黎明阿珠遣報依命而往已過江矣巴延大喜指揮諸將進攻陽羅堡又舟師直衝敵船大戰江中我軍盡追攻之宋軍大潰數十萬衆死傷幾盡流尸蔽江而下夏貴僅能脫命乘舟走至白虎山抵暮方止諸將以貴大將不可使逸請追之巴延曰陽羅之捷吾欲遣使前告宋人而貴走代吾使不必追是夜宋置制使朱禔孫舍鄂州而遁既而沿江諸郡邑皆來降

皆感賈似道蕪湖

十二年二月九日巴延兵入池州宋平章賈似道率孫虎臣夏

貴等悉兵十餘萬號百萬建都督府以戰艦五千餘艘屯丁家洲遣袁克巳宋京等奉國書求成請稱臣歲貢巴延遣千戶囊嘉岱與克巳同往答書如君臣相率納土即當奏聞不然備爾甲兵以決勝負囊嘉岱回言似道不肯降十六日次于丁家洲兩軍相拒數里十八日進戰巴延曰衆寡不敵宜以計勝即令軍中作大棧數十採薪芻置其上陽言欲焚其舟宋人但晝夜嚴備而戰心少懈巴延乃分兵夾江步趨然後麾戰艦合勢衝宋軍阿珠與其前鋒泰州觀察使孫虎臣對陣夏貴以戰艦二千五百艘橫亘江中似道將後軍時我已令諸將順江勢兩岸樹礮擊其中堅南軍陣動巴珠趨我船急進阿珠即手舵衝船雷鼓大震聲動天地我師掠彼舟大呼曰宋人敗矣似道倉皇失措舳艫簸蕩乍分乍合阿珠以小旗麾將校率輕銳橫擊深入宋軍大潰即回棹走巴延以步騎夾岸倚之追奔百五十里殺溺死者蔽江而下水爲之赤獲戰艦二百艘及都督府印軍

資器械無筭似道走揚州貴走廬州虎臣走秦走張世
州軍次當塗和州太平建康相繼款附於我

傑焦山

七月一日張世傑等率水軍操戰艦曰黃鵠白
鷄萬餘艘屯焦山南北每十船為一舫沈鉄破

於江非有號令不得擅自起碇蓋示以必死也時宋將
劉師勇據常州誘浙右新附諸城復叛與世傑虎臣輩
相合咸欲致死於我二日阿珠登石公山望之舳艫連
接旌旗蔽江阿珠曰可燒而敗之委命伉徒善射者千
人載以巨艦分兩翼來射阿珠居中合擊繼以火箭灼
其蓬檣窘無所出董文炳亦以軍直扣焦山之麓交戰
自寅至午宋人力不能支遂潰欲遁又卒不能起破士
卒投江者數萬世傑等鼠竄不知所往追至圖山得船
七百餘艘俘敗兵萬餘大燔毗陵軍至常州先是常帥
自是淮東兵不敢出

劉師勇舉衆附既而陰結外援據城以叛巴延至不忍
加兵乃射書城中曉以禍福許其自新至再三終不從

十七日又令諸掾史書諭文射入城中曰常州我大元已附之城爾衆復來據之大丞相領兵臨城四面攻擊勢易摧枯耳然念我主上好生惡殺務以招徠為先連日遣人告諭未見聽從爾之士民勿以歸降復叛為疑爾之將士勿以拒敵我師為懼約以來日如能出城歸附以保生靈前罪一無所問不安戮一人仍依沿江已附州城一例遷加爵賞四民各令安業若更執迷堅拒城破之日枕尸流血老幼無遺宜速審思無貽後悔又不聽巴延乃親督帳前軍數千臨於南城又多建火砲弓弩等日夜攻之不息十八日諸軍奮勇爭先登木城即豎紅幟於城上四面並進五戰而宋不國矣昱曷亡宋兵大潰克之遂屠其城

命假息閩廣

十三年正月十九日大軍至臨安北五十里陳宜中張世傑蘇劉義劉師勇等挾宋

宗室廣王昺益王昱遁去宋主尋歸命五月一日文天祥宜中世傑等立昱於福州收集潰兵大假閩人爵賞

於是閩中亦變為昱用昱發兵五萬取邵武諸城六月
命彭都統征廣州李恒救邵武至建昌民心少安又破
吳浚兵于南豐九月江西兵與東省阿勒哈董文炳會
征昱招討伊德默色會東省兵于福州右副元帥呂師
夔左副元帥張榮實將兵赴梅嶺與昱兵遇敗之昱遁
海外硯洲十四年九月五日福建宣慰使索多言南劍
州安撫使達魯噶齊馬良佐遣人於福泉等處密探得
殘宋建都廣州改咸熙元年又聞舟師至港口為廣州
官軍殺退回在海內有一山名秀山又名武空山山上
民萬餘家有一巨富者昱買此人宅宇作殿闕屯駐其
兵病死者甚多十一月十五日千戶教化孫獲南人言
宜中奔廣州十二月九日達春圍廣州宜中遁十二日
宋將張鎮孫以廣州降宜中尋與昱曷世傑劉義等走
香山十八日達春會哈喇岱言索多遣人持書諭世傑
昱等驚潰不知所之達春復遣哈喇岱與宣撫梁雄飛
花討王天祿將兵追襲之與世傑軍遇於香山奪戰艦

符印俘其將吏李戊等詰問之茂對世傑攻泉州宜中
衆尚數千人船八百艘比至虎頭山中流為風壞船衆
溺死宜中以身免二十三日沿海經畧使行征南左副
都元帥府兵追昱曷世傑等至廣州七州洋及之戰海
洋中奪船二百艘獲昱母舅俞如珪等十五年五月二
十九日昱將王用來降言昱已死世傑等立曷改元祥
興士卒止萬人而硎洲無糧儲聞瓊州守臣欲給糧二
萬石海道灘水淺急難於轉運止有沘磊浦可通舟楫
宜急以兵守之雷州總管蒙固岱等崖山拉傾六月二
得其說即命諸將進軍為戰守之計崖山拉傾十七日
江東道宣慰使張弘範拜蒙古漢軍都元帥江西省參
政李恒為副都元帥征曷等閏十一月十四日恒入廣
州待弘範降卒戴寶言益王死硎洲廣州屯新會縣之
崖山縛草架木為宮殿凡千餘楹有船七百艘軍士尚
衆由海道渡兩晝夜可抵其聽舍舟莫能往也十六年
正月二日弘範發潮陽港徑往崖山十四日弘範至崖

山圍世傑軍十六日李恒聞弘範已赴海道即率麾下戰艦一百二十艘入海二十二日恒會弘範于崖山初弘範至甲子門獲曷斤侯劉青顧凱知曷棲于崖山之西山南北亘二百餘里東南枕海西北皆港弘範至山北水淺不通乃由山東而南又西與曷遇曷建宮山麓碁結巨艦千餘艘下碇海中中艦而外舳大索貫之為柵以自固四圍樓櫓如城弘範潛舟載騎兵登麓焚其宮曷以鬪艦號快船者焦汲弘範命樂總管山寨斷其汲路恒以拔都船當之曷遣兵爭之皆敗去自是樵牧日狎弘範又命樂總管自寨以砲擊曷艦艦堅不動有烏蛋船千艘救曷賊于北弘範笑曰此徒取死耳夜擇小舟由港西潛列烏蛋船北徹其兩岸且以戰艦衝之烏蛋船皆並海民素不知戰曷又不敢援進退無據攻殺靡遺弘範因取烏蛋載草灌油乘風縱火欲焚曷艦曷預以泥塗艦懸水筒無數火船至鈞而沃之竟莫能燬曷將周文英日挑戰十餘次皆為弘範所敗弘範以

張世傑其父柔之故卒戌祀時有罪逃宋索其甥韓某署萬戶府經歷三遣諭禍福世傑歷數古忠臣曰吾知降生且富貴但為主死不移也韓迫之世傑笑曰果欲我降撤汝圍兵使吾出諸將請以砲攻之弘範曰砲攻敵必浮海散去吾分追非所利不如以計聚留而與戰也且上戒吾屬必誅滅此今使之遁何以復命恒亦謂弘範曰我軍雖圍賊賊船正當海港日逐潮水上下宜急攻之不然彼薪水既絕自知力屈恐乘風潮之勢遁去徒費軍力不能成功也遂畫圖定議與敵船相對六攻二月五日夜弘範召諸將三誓之發砲與曷相對六日平旦弘範分諸將為四軍恒當曷北及西北角樓諸將分居曷南及西弘範將其一居西南去曷里許令曰敵東附山潮退必南遁南軍急攻勿失之西北軍期吾樂作乃戰又令曰敵西南艦可受危聞其將左太守之必驍勇也吾其自攻諸將謂元帥不宜自輕某等當効力弘範曰帥當先其難者頃之有黑氣出山西微雨滿

天弘範曰吉兆也。潮退水南瀉，恒從北面順流衝擊，突入其陣。恒令諸軍船尾命拖師，轉船逆行，徑擣其柵。我軍憑高瞰敵，勇氣百倍，登其船，斷其索，短兵接戰。彼以江淮勁卒，各殊死鬪，矢石蔽空。至巳時，奪三船。恒率拔都軍復御快船戰。至日午，潮水長，北流南面軍預濡，覆艦勢進攻。世傑腹背受敵，以火炮禦，南北流南面軍復順水砲盡，不能灼寸尺。然戰不利，弘範益其卒，始奪一艦。弘範所乘艦布障四匝，伏盾作樂，敵疑宴而懈。弘範以已艦昇於敵，且出入艱，乃回艦尾抵左大左大射矢，集布障，挽索如蝟。弘範度其矢盡，撤障去盾，兵矢火石俱發，奪左大艦。又與夏御史戰，奪七艘。敵懼，去自投水。諸將合勢乘亂，皆殊死混戰，自己至申，聲震天海，斬獲幾盡。曷端明殿學士陸秀夫先沈，妻子於水。時弘範操小舟詣恒家事危矣，奈何？遂抱曷俱死于水。時弘範操小舟詣恒議事，世傑等乘間開南壁，率十六艦奪港門遁去。恒與弘範等追至崖山口，值天晚風雨驟至，烟霧四塞，諸將

各相失弘範還恒獨進追之永宣使翟國秀等解甲就降焚溺之餘尚得海艦八百餘艘七日浮水之屍十餘萬有卒求物屍間言見一屍小而暫衣黃衣負印籤云詔書之寶取寶獻弘範弘範問宋人尹都統曰曷也又問近侍數人皆以為然求之已不得矣世傑奔交趾至海陵港遇風艦敗溺死弘範等磨崖山紀功而還恒追至高州得獲曷尸報遂回蘂芽斯絕惟太祖皇帝以來西夏回紇高昌六詔交州三韓以及中原悉為臣庶獨宋未下我世皇遂能一六合車書混光嶽之氣以上接百王之統嗚呼盛哉若神謀睿筭獨運於萬物之表者有不可得而知將相之方畧士卒之拳勇取舍之機會降下之次第

則悉著篇中

高麗

太祖皇帝之十三年天兵至高麗其王降通使歲貢十
九年盜殺使者遂絕不來太宗三年討之王瞰又降置
京府縣達魯噶齊七十二監之而班師明年盡殺朝廷
所置官以叛保海島遣帥問罪帥中傷死軍回七年八
年九年連以兵拔其城甚多十年瞰遣人奉表詔徵瞰
以母喪辭詔朝明年終不至定宗之二年憲宗之三年

至七年伐不已世祖中統元年王植歸款且言出水就
陸詔罷征二年世子愜朝至元元年八月植以王朝京
師六年其令公林衍廢植立安慶公曰淐者遣國王頭
輦哥以兵撫定詔植復位偕淐衍入朝植受詔得還為
王且來覲淐衍不至七年討衍師壓境衍已前死國人
滅其族因又設官監其國無何植之族承化公以三別
抄叛又遣將破斬之餘黨金通精走耽羅尋亦禽誅植
始歸其王京者居焉是後王來世子入侍寵錫便蕃至

尚主為王官賜功臣號至于今渥澤益以加列聖之涵濡煦嫗者至矣匪頒貢語在禮典茲第書軍旅之事而

附以耽羅焉

太祖十三年天兵討契丹叛人至高麗國人洪大宣降為鄉導共攻其國其王迎王

師降自後歲貢交通使命往來不絕十九年著古與往使中途為賊所害後積年絕不相通太宗三年遣元帥薩里台和尼齊等討之王瞰降置京府縣七十二遠嚕噶齊而班師四年六月殺達嚕嚕齊而叛保海島八月又遣薩里台討之中流矢軍回七年唐古福源征之七八九三年連拔城池十年瞰遣將軍金寶鼎奉表入朝十一年五月詔瞰入朝辭以母喪詔朝明年定宗二年命阿母侃與福源同討憲宗三年命宗王耶虎征之拔禾山城等四年改命扎拉魯征王六七年連拔光州安城等世祖中統元年四月詔王植歸款冊為王請出水

就陸班師罷征二年世子愷入朝三年王植朝至元元年八月植朝九月頒改元詔于其國六年八月世子愷言權臣廢其父立安慶公浥為王詔遣鄂爾多斯布哈李諤詳問九月時納克征之十月差國王孟克圖行省事撫定高麗仍詔植浥林衍入朝十一月二十三日植受詔復位十二月植入朝七年正月討林衍二月植還國設達魯噶齊五月大軍次王京衍已前死六月承化公以三別抄軍叛據江華島劫焚府庫圖籍逃入海中行省令納新追擊之八年正月請尚主五月經畧使實都史樞等攻破珍島斬承化公其黨金通精走耽羅六月世子愷入侍十年四月實都洪察球爾拔耽羅禽金通精十一年五月公主下降於愷復名睦又名昵

日本

日本海國自至元大德間黑迪殷弘趙良弼杜世忠何

文著王積翁釋如智寧一山與高麗之潘阜金有成輩
數使其國惟積翁中道為舟人所殺餘皆奉國書以達
而竟不報聘至元十年實都洪察球爾以二萬五千人征
之第虜掠而歸十七年阿勒哈范文虎輩以十萬人征
之未見敵喪全師二十年安塔海復以十萬人往而昂
吉爾上言民勞乞寢兵上亦謂日本未嘗相侵而交趾
犯邊宜置日本專事交趾遂罷征日本人竟不至國書
始書大蒙古皇帝奉書日本國王繼稱大元皇帝致書

日本國王未並云不宣白不臣之也辭懇懇款款自抑
之意溢於簡冊雖孝文於尉陀不是過焉者還上以為
將命者不達哈達被却上以為典封疆者慎守固禦為
常此將吏之過良弼之往復謂不見報者豈以高麗林
衍叛道梗故耶終不以旅拒名之忻都軍既還其國遣
商人持金來易錢亦聽之又詔勿困苦其商人柔遠之
道至矣阿勒哈之行上宣諭曰有一事朕憂之恐卿輩
不和耳既而諸帥果以輿尸取敗而上言將校不聽節

制逃去載運士至合浦遣還鄉里及敗卒于閭者脫歸則言省臣先潰去棄軍五龍山下為日本所殲諸將之罪始暴著昂吉爾之言曰語曰上下同欲者勝又曰兵以氣為主近歲民貧賦重薦水旱救死不暇復驅之涉海遠征莫不愁歎此非上下同欲也軍嘗挫衄東海倉皇喪氣人無關志非所謂以氣為主也成宗即祚或又建言伐之上曰今非其時朕徐思之卒遣寧一山附商舶往使而已嗚呼世祖之文經武畧與知人之明謙光

之度成宗之能持盈昂吉爾之謹言諸將之罪負日本

之自絕照臨皆當使世有聞焉

至元二年命兵部侍郎哈達禮部侍郎殷弘持

國書往使日本書稱大蒙古皇帝奉書日本國王云云未云不宣白道高麗高麗王植言道險遠不可辱天使命其起居舍人潘阜持書往留六月不得要領而歸五年九月再命哈達弘往至對馬島日本人拒不納交關執其塔二郎彌二郎二人而還六年命高麗金有成送還執者且俾中書省牒其國亦不報十二月又命祕書監趙良弼往使良弼乞定與其王相見之儀廷議與其國上下分未定與其國且無禮數上從之良弼至留其太宰府守護所者久之時又有曹介叔者上言高麗還路導引國使有捷徑順風半日可到但使臣則不敢同往大軍進征則願為鄉導上曰如此則當思之九年五月命高麗王植致書日本諭使通好始遣彌四郎者入

朝上宴勞之既又逼使者徒歸竟不報聘十年命鳳州經畧使賓都高麗軍民總管洪察球爾以十料舟巴圖輕疾舟汲水小舟各三百共九百艘載士卒二萬五千伐之十一年十月入其國敗之而我軍不整箭又盡第虜掠四境而歸十二年遣禮部侍郎杜世忠兵部侍郎何文著計議官蘇都爾丹往使書前言大元皇帝致書于日本國王後言不宣白亦不來覲十四年遣商人持金來易銅錢許之十七年十月立日本行省命阿勒哈為右丞相與左丞相范文虎及賓都察球爾等率十萬人討之十八年二月諸將陞辭上曰有一事朕憂之恐卿輩不和耳范文虎新降者也汝等必輕之八月諸將未見敵喪全師以返上言至日本欲攻太宰府暴風破舟猶欲議戰萬戶厲德彪王國佐等不聽節制逃去本省載餘軍至合浦散遣還鄉里未幾敗卒于閭脫歸言官軍六月入海七月至平壺島移五龍山八月一日風破舟五日文虎等諸將各自擇堅好船坐去弃士卒十餘萬

于山下無食無主者三日衆議推張百戶者為主帥號之曰張總管聽其約束方伐木作舟欲還七日日本人來戰盡死餘二三萬虜去九日至八角島盡殺蒙古高麗漢人謂新附軍為唐人不殺而奴之閩輩是也蓋行省官議事不相下故皆棄軍歸久之閩與莫青吳萬五者逃還十萬之衆得返者此三人也二十年命安塔海為日本省丞相徹爾特穆爾右丞劉二巴圖左丞陳某右丞鄭某叅政往以十萬人往淮西宣慰使昂吉爾上言民勞乞寢兵二十一年又以其俗尚佛遣王積翁者與普陀僧如智往使舟中自不願行者共謀殺積翁不果使而返二十三年上曰日本未嘗相侵今交趾犯邊宜置日本專事交趾成宗大德二年江浙省平章政事伊蘇岱爾乞用兵日本上曰今非其時朕徐思之大德三年遣僧寧一山者加妙慈弘濟大師附商船往使日本而日本人竟不至

安南

安南以險遠為國自憲宗世祖時大將烏蘭哈達鎮南

王托歡凡兩以王師入其所居之城其餘疆場之事皆

細微也然亦畧載之

憲宗二年世祖征大理發中道烏蘭哈達由西道晏當路諸王綽哈

伊濟哩由東道白蠻進三年大理平四年世祖北還留烏蘭哈達攻諸夷未附者七年兵次交趾北阿闐遣使

往諭不返又遣齊齊克圖等將兵進抵洮江烏蘭哈達繼進十二月十三日交人敗入其國王陳勝竄海島出所

遣使獄中屠其城留九日以熟班師還至三十七部鬼方復遣二使招勝勝還國憤殘毀縛還二使八年勝傳

國長子光曷光曷遣其婿以方物來見烏蘭哈達遣訥刺丁招光曷來朝光曷納款中統元年禮部郎中孟甲

充南諭使持詔入安南光曷遣族人通侍大夫奉公員
外郎諸衛寄班阮瓌等詣闕獻書乞三年一貢從之至
元三年頒改元詔賜厯日十四年光曷卒其世子日烜
立累徵入朝不至十八年十月立安南宣慰司以巴延
特穆爾為叅知政事行宣慰使都元帥設僚屬有差詔
立陳遣愛為安南王二十年阿爾哈雅以書抵日烜俾
助兵糧攻占城上命鎮南王道交趾伐占城二十一年
十月師次永州安南遣興道王率衆二萬屯衝要以扼
王師十二月敗之于可離隘又敗之于洞板隘殺其將
秦岑至內旁隘敗其興道王遁走執其將大僚班段台
進至萬劫興道王又敗走官軍至富良江日烜親拒戰
敗棄城走天長府師入其國別將右丞唐古岱敗其太
師昭明王雲肅王左天王等兵宗王耀格敗其昭孝王
于清化府斬之大軍追日烜于阿魯江德剛江處處破
之進至天長府日烜又敗走禽其建德侯陳仲追至膠
海口不知日烜所在其族昭國王文義侯武道侯明智

侯明誠侯彰懷侯彰憲侯義國侯等皆降唐古弑追日
烜及其上皇至安邦海口棄船走山林尋聞入清化府
四月交兵大起其興道王攻萬戶劉世英于阿魯堡忠
誠王攻千戶馬榮于江口皆殺退既而水陸來攻大營
城圍數匝雖多死增兵轉衆官軍朝暮鏖戰困乏器械
皆盡遂棄其京城渡江屯駐尋班師至如月江日烜遣
其懷文侯來追殺之至冊江伏發官軍蹋斷浮橋多溺
死七月事聞樞密院請以兵五千期今年十月會潭州
征之二十三年正月議徵兵客省復大舉伐安南詔立
其族之來降者益稷為安南王秀峻為輔義公以奉陳
氏祀日烜上書東宮哀鳴求罷兵湖南宣慰司亦上言
民疲士卒多死傷詔散兵還各營罷征二十四年令烏
瑪喇樊叅政率兵水陸進征交趾尋亦罷三十年以累
徵不至議遣劉二拔都征之世祖上仙成宗即祚詔赦
罪日燔

雲南

憲宗御極當癸丑之歲世祖以皇帝奉詔征西南氏命
烏蘭哈達為先驅期年還朝烏蘭哈達專征至五年悉
定凡得城五府八郡四蠻部三十七至元四年冊宗室
和克齊為雲南王遣就國鎮撫之自是裔夷獷俗時起
跳梁則皆郡縣其地之後之事故第八招捕類中此不
載憲宗三年世祖征西南夷由土蕃入雲南命烏蘭哈達自旦當領入降摩些部涉金沙江攻下諸砦取龍
首闕世祖遂入大理國城烏蘭哈達分兵取附都善闡
烏爨次羅部府大酋高昇拒戰大破於淺可即山下昇

嬰城自守城際滇池三面皆水難攻圍七日始克國主
段智興乘暗權臣高祥方謀篡弑及大兵至智興走匿
昆澤追及善郡獲之世祖入其城秋毫不犯尋引兵入
土蕃酋長唆火脫因塔里堅守烏蘭哈達進攻懼而出
降用為鄉導襲取白蠻譯曰察罕章蠻依山固守烏蘭
哈達令其子阿珠殺蠻退走乘勝至烏蠻曰哈剌章攻
破水城四年春世祖還烏蘭哈達至烏蠻之都曰押赤
城依山阻水不可近鬼蠻輩復助之烏蘭哈達攻不下
阿珠攀城而入遂拔之又下乾德哥城圍巴哈合因國
拔赤土哥塞又克忽闌城降羅羅斯阿伯阿魯諸國凡
平五城八府四郡烏白等三十七部蠻
至元四年命和克齊為雲南王以鎮之

建都

建都古越雋也至元四年齊勤領兵招諭其人亦有願

為內應者既而以無功坐誅九年親王伊蘇岱爾乞往

征十一年蒙古台又往征元真間立軍民總管府于其

地然出師振旅降下攻擊之詳簿書闕焉

至元三年九月四川行院

言建都欲降乞降詔招之四年九月齊勤乞領兵招建都從之十月下詔招諭五年三月建都總管軍民大頭目八坐億智拍祖不作四人遣急吉者來告乞官軍攻城我等殺國主効力王蕃頭目晚着亦願助糧六年六月齊勤無功亡士卒棄市九年正月親王伊蘇岱爾願領六千人往征之上從其請十一年命蒙古台領兵一萬一千五百征之元真二年五月丞相諤魯奏立建都軍民總管府

緬

朝廷以至元十年始遣使招緬不至十四年春緬人犯邊偏將忽都土官信苴日輩大敗之十月行省遣尼雅斯拉鼎破其三百餘砦然皆方面疆場之事二十年使詔宗王桑阿克達爾往征破其江頭城二十二年乃議納款貢方物既其王為庶子不速速古里所囚大德二年其臣阿散哥也復擅廢立四年命宗王庫庫雲南省平章政事色辰額呼蒙固圖嚕默色等率師問罪功不就而還臣作政典見高麗有林衍承化公金通精之亂今緬亦

似之皆叢爾國而屢有弗靖至煩朝廷兵鎮撫可憐哉

至元八年大理鄯闡等路宣慰司遣奇塔特托音等使緬
招其內附不得見其王見其臣下遣价博者皆來十年
以乞台脫因充禮部郎中與噶瑪拉實哩及工部郎中
劉源工部員外郎蘇爾約蘇充國信使副持詔往諭徵其
子弟大臣來朝十二年四月建寧路安撫使賀天爵言
金齒人阿郭知入緬三道一由大部馬一由驃甸一由
阿郭地俱會緬之江頭城又阿郭親戚阿提犯在緬掌
五甸戶各萬餘欲內附阿郭願先招阿提犯及金齒之
未降者為引導雲南省因言緬王無降心去使不反必
須征討聖旨姑緩之十一月雲南省始報差人探伺國
信消息蒲賊阻道今蒲人漸多降者道稍通遣金齒千
額總管阿禾探的國使以達緬俱安十四年三月緬人
以阿禾內附怨之攻其地欲立砦騰越永昌之間時大
理路蒙古千戶呼圖克大理路總管信直日總把千戶托

多爾海奉命伐永昌之西騰越蒲驃阿昌金齒之未降
部族駐南甸阿禾告急呼圖克等晝夜行與緬軍遇一河
邊其衆約四五萬象八百馬萬疋我軍僅七百人緬人
前乘馬次象次步卒象被甲背負戰樓兩旁挾大竹筒
置短槍數十根於其中乘象者取以擊刺呼圖克下令賊
衆我寡當先衝河北軍親率二百八十一騎為一隊信苴
日以二百三十三騎傍河為一隊托多爾海以一百八
十七人依山為一隊交戰良久賊敗走信苴日追之三
里抵寨門旋寧而退忽南面賊兵萬餘統出我軍後信
苴日馳報呼圖克復列為三陣進至河岸擊之又敗走追
破其十七砦逐北至窄山口轉戰三十餘里賊及象馬
自相蹂死者盈三巨溝日暮忽都中傷遂收兵明日追
之至千額不及而還捕虜甚衆軍中以一帽或一兩靴
一氊衣易一生口其脫者又為阿禾阿昌邀殺歸者無
幾而官軍負傷者雖多惟一蒙古軍獲一象不得其性
被擊而斃餘無死者十月雲南省遣某道宣慰使都元

師尼雅斯拉鼎率蒙古蠻焚摩些軍三千八百人征緬至江頭深蹂首細安立砦之所招降其木乃木要蒙帖木巨木禿磨欲等三百餘砦土官曲臘溝折民四千孟磨愛呂民一千磨柰蒙匡黑答八刺民二萬蒙古甸甫祿保民一萬木都彈禿民二百以天熟還師二十年十一月王師伐緬克之先是詔宗王桑阿克達爾右丞塔布察知政事伊克迪音將兵征緬二十年九月一日大軍發中慶十月二十七日至南甸塔布田羅必甸進軍十一月二日桑阿克達爾命伊克迪音取道於阿昔江達鎮西阿禾江造舟二百下流至江頭城斷緬人水路自將一軍從驃甸徑抵其國十一日與塔布軍會十三日令諸將分地攻取十九日破其江頭城擊殺萬餘人別令都元帥表世安以兵守其地積糧餉以給軍士遣使持輿地圖奏上二十二年十一月緬王遣其鹽井大官阿必立相至太公城欲來納款為孟乃甸白及頭目斛塞阻道不得行遣騰馬宅者持信搭一片來告驃甸土官

匿俗乞報上司免軍馬入境匿俗給榜遣騰馬宅回江
頭城招阿必立相赴省且報鎮西平緬麗川等路宣慰
司宣撫司差三捺持榜至江頭城付阿必立相忙直卜
美二人期以兩月領軍來江頭城宣撫司率蒙古軍至
驛甸相見議視事阿必立相乞言於朝廷降旨許其悔
過然後差大官赴闕朝廷尋遣鎮西平緬宣撫使達魯噶
齊兼招討使實喇使其國二十四年正月緬王為其庶
子不速速古里所執囚於昔里怯答刺之地又害嫡子
三人與大官共木浪周等四人同為逆雲南省請今秋
進討奉旨不聽既而雲南王與諸王進征至蒲甘喪師
七千餘始平定歲貢方物大德元年緬王遣其子僧加
八的來朝賜王爵印封僧加八的為世子二年雲南省
先遣管竹思加使登籠國其國王遣其舅兀刺合兀都
魯新合二人從管竹思加赴闕二月至蒲甘緬王帖滅
的令可瓦力引軍登舟縛去兀刺合兀都魯新合劫掠
貢物以去六月管竹思加至太公城緬人阿只不加闌

等來言舊緬王帖滅的實行劫奪於爾今已去位鄰聶
為王遣我輩召爾議遣人赴朝管竹思加至蒲甘鄰聶
曰帖滅的引八百媳婦軍破我甘當散當只麻刺班羅
等城又劫奪爾登龍國人物爾等回朝不知其故必加
兵於我今帖滅的已廢特差大頭目密得力信者章者
思力三人奉貢入朝又移文雲南省稱木連城土官阿
散哥也皇帝命佩大牌子為官人初實無罪前緬王欲
殺之聖旨令安治僧民前緬王却通叛人八百媳婦引
兵來壞甘當散當只麻刺班羅四族百姓又劫奪登
龍國貢物是故阿散哥也阿刺者僧吉藍僧哥連等廢
前緬王令我為王行省以聞三年八月太公城總管細
豆移文江頭站頭目逮的刺必塞馬加刺言阿散哥也
兄弟三人領軍三萬謂答麻的微緬王及其世子曰自
歸大元之後使我多負勞費殺緬王以下世子妻妾父
師臣僕百餘人雲南行省問其持文書來者我文哥言
緬王就弑時謂阿散哥也曰我祖以來不死於刀可投

欽定四庫全書

元文類
卷四十一

三十四

我水中或縊死遂縊之埋死所屋下七日風雨不止夢其國人曰吾埋不得其地若焚尸弃骨於水則晴從之果然我文哥出十餘日又聞世子及逃出次子之母與父師臣僕與前此隨國信使留緬回回輝和爾漢入百餘輩皆被害阿散哥也又逼淫新王之母是月緬王之子古馬刺加失八颶耽入者里及其師來奔陳辭於雲南省乞復讐大緊謂阿巴民叛緬王乞師朝廷伐定之叛人怒謂王求軍殺掠我為人奴遂修城聚兵謀廢其王又僧可速左右及阿刺者僧吉藍從人相繼從叛者殺害密里都邦加郎等族王謂其兄阿散哥也可勸汝兄弟勿爾對曰我說必聽不聽我親伐之王悉以其民付阿散哥也因此力衆遂生二心王執而囚之僧哥速等於不甘雨宿吉老亦之地築大城拒守水陸進兵來逼蒲甘王釋阿散哥也今百官乘象馬從阿散哥也出見僧哥速僧哥速奪象馬掠百官求錢物燒城池鎖王足置豕牢中分其妻妾王為皇帝奴冤苦如此望拯救

雲南行省左丞蒙固圖噶默色又上言緬王歸朝十一年矣未嘗違分今其臣阿散哥也兄弟三人以三罪加其身置父子縲繼又通新王之母據舊王之妻妾假三罪皆實亦當奏從朝廷區處乃敗擅禮廢立豈有此理今其子來求救且小甸叛人劫虜官民尚且赴救答麻剌的徵王乃上命為國主叛臣囚之豈可不救抑使外國效尤為亂將致大患行省以聞已而又聞新主亦被弑阿散哥也篡立九月中書聞於上上曰蒙固圖噶默色之言是也速議奏行十一月阿刺哥也犯邊攻阿真谷馬來城距太公城二十里駐兵尋退四年正月召蒙固圖噶默色赴闕議兵事五月故緬王婿馬來城土官納速刺上言大德元年朝廷遣尚書嘉瑋岱伴送世子僧加八的還國國王集衆聽詔惟阿刺者僧吉藍僧哥速不至二年二月二人興兵叛來駐蒲甘近境王亦整兵諭叛賊之兄阿刺哥也曰爾二弟不聽詔又敢為亂爾令退兵從命則已否則爾同謀阿刺哥也諭之不

欽定四庫全書

元文類
卷四十一

三五

從王遂因阿刺哥也二人引兵逼城王遣納速刺等出戰納速刺敗被擒王令國中諸僧出謂二人曰毋徒苦百姓爾欲害我乎若無此心當釋爾兄復乃職否則明以告我阿散哥也及二弟皆曰王是我主豈有異心如不信請入大寺為重誓從之誓畢釋之賊退納速刺亦得歸至五月三人合兵攻蒲甘執及世子僧加八的達次子朝乞力朝普囚於木連城凡十又一月三年四月十日阿刺哥也令弟阿難答速弒緬王并二子餘子康吉弄古馬刺加失巴遁去放世子於蒲甘而奪其妻又分擄王妻妾共立王孽弟鄒鼎方十六歲誅不附已者十二月又攻破阿真國馬來兩城納速刺逃來正月十五日中書樞密奏征緬事蒙圖嚕默色請用六千人臣等謂緬與八百媳婦通好力大非一萬人不可奉旨所擬猶少可增為一萬二千人又奏蒙圖嚕默色乞與色辰額埒劉都元帥德祿同事及求雲南土官高阿康從軍又請命親王庫庫監軍以振兵威皆從之上曰

庫庫雖去勿令預事四年閏八月雲南平章政事色辰
額圻蒙固圖嚕默色等發軍中慶期至大理西永昌勝
越會集十月八緬十二月五日至馬來城大會十五日
至阿散哥也兄弟三人所守木連三城相接賊出戰敗
之賊閉門拒守蒙固圖嚕默色劉左丞據城東北面色
辰額圻高阿康叅政據西面正南無軍守之賊日出戰
城內四面立三梢單梢砲向外攻擊官軍尋立排沙圍
其城五年正月分軍破其石山寨又召白衣催糧軍二
千助圍其城南十九日城上發矢石擂木殺官軍五百
餘人二月二日阿散哥也令十餘人呼曰我非叛人乃
是皇帝良民以緬王作違理三事我等收之彼自飲藥
而死非我等殺之我等蒙古人無甚作惡若許我投降
省官鑒之賊遂使人持金銀禮物出見省官諭賊三人
親出方可不然難信若一年不出我軍亦住一年賊竟
不肯親出一十七日萬戶扎延徹爾等狀陳天熱瘴發
軍勞苦不還實懼死傷獲罪若令我等住夏瘴死不如

赴上前就死若明白有旨孰敢不住在法口傳聖旨勿
行我等今當迴軍二十八日分省官方議軍事扎延徽
爾等俱領軍起營回二十九日分省官亦回三月五日
至阿占國城追及扎延徽爾等蒙國圖嚕默色移文稱
大功未成豈可回軍若爾等果不肯住可留一半軍或
三千當職當住夏守賊平章色辰額呼劉左丞高叅政
皆言平章可住我輩亦可住我輩皆願住夏徧告軍官
俱令住夏是日新王之母衆象追及分省官訴賊拘我
於木連城今始放出若大軍五日不迴必出降惜乎回
軍扎延徽爾等宣言病軍皆已先行我等明日亦去無
可議者分省官命追回先行軍皆言去已遠何可及次
日將校皆回分省官亦由蒙來路歸色辰額呼蒙國圖
嚕默色上言賊兵困屈旦夕出降參政高阿康土官察
罕巴哈軍官扎延徽爾等同稱軍多病不可住擬合回
軍下令留之不聽恃親典兵權引軍而回彼既行矣分
省亦不能住又言朝廷所立緬王已送至其父舊所居

城中報賊脅從者已少皆從我矣若可住當遣人再報若不可住我亦走出又言賊饋阿康酒食阿康受之疑是寶貨又軍回五程阿康出銀三千兩曰此阿散哥也賂衆將校者色辰額爾等言此銀爾實受之我輩未嘗知也欲與諸將爾自處之蓋因阿康與察罕巴哈等預此行故功不成乞置對以懲後八月八日丞相諤魯等奏奉旨遣河南平章政事二格等赴雲南雜問之蓋自宗王庫庫平章政事色辰額呼蒙回圖嚕默色左丞劉德祿叅知政事高阿康下至一二大將校幕官令史皆受賂賂瓜難已至兵中復縱之共為金八百餘兩銀二千二百餘兩遂不能號令偏裨阿康因與察罕巴哈謀令諸將抗言不能住夏檀回阿康察罕巴哈伏誅蒙固圖嚕默色前死色辰額呼劉德祿遇赦皆追奪宣勅永不叙用蒙固圖嚕默色子不得廕首沮軍事萬戶約約和爾多卜丹千戶托克托穆爾真決有差皆奪所居官籍其家產之半餘將校各以輕重被笞察罕巴哈者麗江路

軍民宣撫使也

占城

占城初嘗奉表來降至元十九年以執國使興師問罪二十年正月破其木城泊大州其主字魯由補刺者吾遁走其舅寶脫禿花陽求降附以款我師陰為戰計往返再三辭語支蔓總兵官索多竟不之覺及得曾延之報始疑信相半而已墮其術中幾陷偏師嗚呼鄙夷亦多詐哉二十一年之征則以安南道阻不果語在安南

事中

至元十五年左右丞索多以宋平因遣人至占城還言其王失里咱牙信合八剌麻哈迭瓦有內附意

奏之詔降虎符授榮祿大夫封占城郡王十六年十二月遣兵部侍郎教化迪總管孟慶元萬戶孫勝夫與索多使占城諭其王入朝十七年二月占城國王保寶旦拏囉耶邛南謁占把地羅耶遣使貢方物奉表降十九年十月征占城初朝廷以占城國主字由補剌者吾曩歲遣使來廷稱臣內屬謂其誠服遂命左丞索多等就其地立省以撫安之既而其子補的專國負固弗服萬戶何子志十戶皇甫傑使暹國宣慰使尤永賢亞蘭等使馬八兒國舟經占城海道皆被執故征之上曰老王無罪逆命者乃其子與一蠻人耳苟獲此兩人百姓當依曹彬故事不戮一人十一月占城行省官率兵自廣州航海二十九日師次占城港口北連海旁有小港五通其國大州東南止山西旁木城官軍依海岸屯駐占城兵自三十日為始治木城四面約二十餘里起樓

柵立回回三梢砲百餘座又木城西十里建行宮宇魯
補刺者吾親率大兵屯守應援行省遣都鎮撫李天祐
總把賈甫招之七往終不服十二月十八日占城貽書
刻期請戰二十年正月行省傳令軍中以十五日夜半
發船攻城至期分遣瓊州安撫使陳中達總管劉金總
把栗全以兵一千六百人由水路攻木城北面總把張
斌百戶趙達以三百人攻東面沙觜省官二千八分二
道攻南面舟行至天明泊岸為風濤所碎者十七八賊
開木城南門建旗鼓出萬餘人乘象者數十亦分三隊
迎敵矢石交下自卯至午賊敗北官軍入木城復與東
北二軍合擊之殺溺死者數千人守城供餉餽者數萬
人悉潰散國主棄行宮燒倉廩殺永賢亞蘭等與其臣
逃入山十七日整兵攻大州十九日國主使報答者來
求降二十日兵至大州東南遣報答者回許其降免罪
二十一日入大州尋又遣博思兀魯班者來言奉王命
來降國主太子後當自來行省傳檄召之我師復駐城

外二十三。日遣其舅寶脫禿花等三十餘人奉國主信物雜布二百疋大銀三定小銀五十七定碎銀一甕為贄歸款。又獻金葉九節標鎗曰國主欲來病未能進先使持其槍來以見誠意。長子補的期三日請見省官却其物寶脫禿花曰不受是薄之也。行省度不可却姑令收置聽候。上聞二十九日寶脫禿花復令其主第四子利世麻八都八德刺第五子利世印德刺來見且言先有兵十萬故求戰今皆敗散間敗兵言補的被傷已死國主頗中箭今小愈愧懼未能見也。故先遣二子來議赴闕進見之事。來省官疑其非真子不之質聽其還諭國主早降且以問疾為辭遣千戶林子全總把李德堅栗全偕往覘之。三十日二子在途先歸子全等入山兩程國主遣人來拒不果見寶脫禿花謂子全曰國主遷延不肯出降今反揚言欲殺我可歸告省官來則來不來我當執以往見子全等回營是日又殺何子智皇甫傑等百餘人。二月八日寶脫禿花又至自言吾祖父伯

叔前皆為國主至吾兄今字由補刺者吾殺而奪其位
斬我左右二大指我實銜之願禽字由補刺者吾補的
父子及太拔撒機兒以獻請給大元服色行省賜衣冠
撫諭以行十三日居占城唐人曾延等來言國主逃于
大州西北鴉候山聚兵三千餘并招集他郡兵未至不
日將與官軍交戰懼唐人泄其事將盡殺之延等覺而
逃來十五日寶脫禿花偕宰相保孫達兒及撒及等五
人來降行省官引曾延等見寶脫禿花詰之曰延等姦
細人也請繫縲之國主軍皆潰散安敢復戰又言今未
附州郡凡十二處每州遣一人招之舊州水路乞行省
與陳安撫及寶脫禿花各遣一人乘舟招諭攻取陸路
則乞行省官陳安撫與已往禽者國主補的及攻其城
行省猶信其言調兵一千屯半山塔遣子全德堅領軍
百人與寶脫禿花同赴大州進討約有急則報半山軍
子全等比至城西寶脫禿花背約間行自北門乘象遁
入山官軍獲諜者曰國主實在鴉候山立砦聚兵約二

萬餘遣使交趾真臘闍婆等國借兵及徵兵多龍舊州等軍未至十六日遣萬戶張顥等領兵赴國主所棲之境十九日顥兵近水城二十里賊浚濠塹拒以大木我軍斬刈超距奮擊破其二千餘衆轉戰至木城下山林阻隘不能進賊旁出截歸路軍皆殊死戰遂得解還營行省遂整軍聚糧糧木城遣總管劉金千戶劉涓岳榮守禦三月六日索多領軍回十五日江淮省所遣助索多軍萬戶呼圖克等至占城索多舊制行省館眉蓮港見營舍燒盡始知官軍已回二十日呼圖克令百戶陳奎招其國主來降二十七日占城主遣陳通事者來稱納降呼圖克等諭令其父子奉表進獻國主遣文勞印大巴南等來稱索多除蕩國貧無進物來年多備禮物令嫡子入朝四月十二日國主令其孫濟目理勒蟄文勞印大巴南等奉表歸款二十一年命平章阿爾哈雅奉鎮南王托歡發兵假道交趾伐占城不果進

海外諸蕃

海外諸蕃見於征伐者惟瓜哇之役為大會三行省兵二萬設左右軍都元帥府二征行上萬戶府四發舟千艘費鈔四萬定賞一年糧降虎符十金符四十銀符百金衣段百端備賞往返八閱月瓜哇降而復叛伐葛郎得其妻子官屬百餘人而還其餘遜荅流求三嶼俱藍馬八兒那旺蘇木都刺蘇木達也里可溫木速蠻須門那僧急里南無力馬闌丹丁呵兒來來急闌亦台進麻

里子兒阿昔之屬又皆瑣瑣者其至也或遣使招來或
遙入貢不皆以兵下

瓜哇

至元二十九年二月八日詔福建行省授伊克默色使
弼高興為平章政事征瓜哇軍二萬海舟千艘給一年
糧二十五日伊克默色等陛辭上曰卿等至瓜哇明告
其國軍民朝廷初與瓜哇通使往來交好後刺詔使孟
右丞之面以此進討九月軍會慶元弼伊克默色領省
事赴泉州興率軍輜自慶元登舟涉海十一月福建江
西湖廣三省軍會泉州十二月十四日自後渚啟行三
十年正月十八日至拘攔山議方畧二月六日伊克默
色孫叅政先領本省幕官并招諭瓜哇等處宣慰司官
曲哈雅楊梓全忠祖萬戶張塔喇齊等五百餘人船十

艘往招諭議定後七日大軍繼進于吉利門相候十三日弼興進至瓜哇之杜並足與伊克默色等議分軍下岸水陸並進弼與孫叅政帥都元帥諾海萬戶甯居仁等水軍自杜並足由戎牙路港口至八節澗興與伊克默色都元帥鄭鎮國萬戶托歡等馬步軍自杜並足陸行以萬戶申元為前鋒遣副元帥圖古德埒克萬戶褚懷遠李忠等乘鐵風船由戎牙路於麻喏巴歇浮梁前進赴八節澗期會二十一日招諭瓜哇宣撫司言瓜哇王土罕必闍耶舉國納降土罕必闍耶不能離軍先令楊棹甘珠爾布哈全忠祖引其宰相昔剌難答叱耶等五十餘人迎三月一日會軍八節澗澗上接杜馬班王府下通莆奔大海乃瓜哇咽喉必爭之地又其謀臣希寧官沿河泊舟觀望成敗再三招諭不降行省於澗邊設偃月營留萬戶王天祥守河津圖古德埒克李忠等領水軍鄭鎮國省都鎮撫倫信等領馬步軍隨省水陸並進希寧官懼棄船宵遁獲鬼頭大船百餘艘令那海居仁萬

戶鄭珪高德誠張受等鎮八節澗海口大軍方進土罕
必闌耶使來告葛郎王追殺至麻喏巴歇請官軍揀援
伊克默色張叅政先往安慰土罕必闌耶鄭鎮國引軍
赴章孤接援興進至麻喏巴歇却稱葛郎兵未知遠近
興回八節澗伊克默色尋報賊兵今夜當至召興赴麻
喏巴歇七日葛郎兵三路攻土罕必闌耶八日伊克默
色孫叅政率萬戶李明迎賊於西南不遇興與托歡由
東南路與賊戰殺數百人餘奔潰山谷午時西南路賊
又至興再戰至晡又敗之十五日分軍三道伐葛郎期
十九日會荅哈聽砲聲接戰圖古德埒克等水軍泝流而
上伊克默色等由西道興等自東道進土罕必闌耶軍
繼其後十九日至荅哈葛郎國主以兵十餘萬交戰自
卯至未連三戰賊敗奔潰擁入河死者數萬人殺五千
餘級國主入內城拒守官軍圍之且招其降戌時國主
哈只葛當出降撫諭令還四月二日遣土罕必闌耶還
其地具入貢禮以萬戶龜珠卜丹甘珠爾布哈率兵二百

護送十九日土罕必閣耶背叛逃去留軍拒戰龜珠卜
升甘珠爾布哈省接馮祥皆遇害二十四日軍還得哈只
葛當妻子官屬百餘人及
地圖戶籍所上金字表

平都爾蘇

天曆元年九月壬申今上皇帝即大位詔天下其節文
曰洪惟我太祖皇帝肇造區夏世祖皇帝混一海宇爰
立定制以一統緒宗親各授分地勿敢妄生覬覦此不
易之成規萬世所共守者也世祖皇帝之後成宗皇帝
武宗皇帝仁宗皇帝英宗皇帝以公天下之心以次相

傳宗王貴戚咸遵祖訓至於晉邸具有盟書願守藩服而與賊臣特克實額森特穆爾等潛通陰謀冒干寶位使英皇不幸罹于大故朕兄弟播越南北備歷艱險臨御之事豈獲與聞朕以叔父之故順承惟謹于今六年災異迭見權臣都爾蘇諂卜都拉等專擅自用疏遠勲舊廢棄忠良變亂祖宗法度空府庫以私其黨類大行上賓利於立幼顯握國柄用成其姦明詔既下於是都爾蘇之罪暴於縣宇中外同心奮勇敢憤卒致乾坤清夷

歸壘神聖宗社尊安四海樂業是編自八月甲申今太
師中書右丞相臣雅克特穆爾舉義至十月庚戌齊王臣
伊魯特穆爾奉上寶壘大臣奏散遣諸軍以至都爾蘇
棄市三閱月之間致天下晏然者悉具簡冊焉

招捕

真聖樹業中天下以家宅天武不涉斯生蘗芽要荒四
履六詔遐邇閩廣播思兩江海涯遼霄江右嶺蜀木波
番分龍盧

自此下皆
一字種名黎別生熟撞爨驃蒲徭芒焚娒人
賒

切落落顧顧綿綿羅羅

此疊字名綿綿則村名用以足句羅羅羅斯也

白衣

金齒漆頭花角八百妾御七十閨閣

音奢此以其服飾及所有為種名者

八百媳婦七十城門皆國名

甸砦團洞箐柵墟畚岳盤川屋激駛谿

訝山經叵究堅亥斯差

此下一字地名也

廣瑤縹慶甸兼我凍

斜山經叵究堅亥斯差

名團齒判粘凹村名

頻計淥在影雷窖瓢木

茶

洞名

睢暇之州酒涌之社琅詡之譚濃聳之坡

此下皆二字地

名此其尤奇者也

昵昌瓦農獲架必迦苴善抽俸矣比枯柯車

里烏撒蹉泥窩散毛爛土雍真淥查林背嶺豚那結都

渦杜望杜暮白定白奪大踢青特筠連豕驚赤珊藍塞

鬼骨果夥掙猛甕省騰串昔霞曰九層際

此下三字地名

曰新

而元曰伽矣傑曰百眼佐曰水手浪曰上落麼師宗彌

勒

此下四字地名

阿尼必斛一奚卜薛阿白出麻獏狃狃狃八

郎篤公吸刺豁腫客客昔多夷生其中自為雄夸火頭

大老

此下皆酋長位名

把事希古軍火營主山主尊長族種謬

悠氏名聲牙提呂摩耳

此下二字人名

訇思阿禾雄挫渾弄矣

豆者哦雙米拜法的并荅麪个忙尼鴈莽占居些谷納

刺構阿葵胡弄芬采只驗娘報竹哥細麥嬰上亞浪落
麼蒙毳空弟羅勾非白阿氈卧踏委界勾巴合彪鮮的
官兜心批瓦英厭薛甲古阿娥若過生琮

此下三字
是人名

大

希婆若夢兀仲若渾乞濫若約薛要若阿慝瓜若卜制
頭若閉羅璽若天程猱若思蓬怯若勸權吉若黃公麥
若獨然棚若大河沙必乖豆來

此下四字
是人名

蒲雪韋吠麻納

布昌玉不廉古六分斬斤蘆崩信備荅晏什用喉社句

耶山公氏真

此下四句
著夷姓異

的傍系猫古綴派盤窮腸譜陀

貞公猫的傍盤
古綴陀窮腸

健婦作配匪婉婉娃阿衣納衣

此下二字婦人

名折射折利阿初地節攬陶蘇他有忙葛農

此下三字婦人名

有梳蠻塔有南貢弄率蒸報窻嬰

上於加切下苦加切韻釋女作姿態貌今

中原方言為婦人狠惡之稱

融結之左生息之野風氣不淑習俗異

華故雖橫目以生悉獷黠奇衰不有天彝國憲謂何骨

肉睚眦閱爭紛拏重譯之言駛舌譎訥

上涉加切下文加切

喜人

怒獸含戴則那製衣不領不巾以靴裂綵纏髀椎結髮

髻起居佩刀少忤輒相加或嘯徒復讐蠻觸閼蝸或出

犯徼地為王民孽痾焚劫公私脫囚拳枷邊吏捕之則

螳螂奮斧以禦車標槍批竹矢毒如蛇敗則各鳥鳥散

入險阻隈阿貢鋤坐草軍圍戶牖木狀益顯魚糧虵

俗作

賦鏐自貢鋤以下禽獸畜之朝不見譴訶或畧誅弗難

事詳見後

獮以兵戈革面而來羈縻撫錫賚冠服銅印青緇粵若

妖民造異興訛妄竊位號自投網罟黃華獠狂黎德蛟

譁六十鳴臬五九跳繩聖許萬頃鎮龍郎達圓明廣德

細春可用魚鼎紀號鼠穴正衙

劉六十蔡五九黃聖許
李萬頃楊鎮龍韋郎達

黃廣德丘細春杜可用圓明和尚皆嘗坐止其身族鄙

偕號改元建朝殿縣闕牌事亦見于後

宥赦

叶平聲

惻不盡戮視同羖羖於乎我元王政頗文柔

武競互出兼施

叶疎何切

威聲其訇流澤滂沱會粹諸畢為

招捕之科雲南

至元十三年正月羅甸官禾者阿禾必紹降十月雲南省調蒙古覺楚諸軍

征白衣和泥一百九砦土官甸思叛溪等七溪等降得戶四萬又攻金齒落落廣甸瑤甸殺掠甚多又攻斜烏

蒙禿老蠻高州筠連等州十九處烏蒙阿謀歸舊侵藤串縣地是月與安南鄰者七十城門國主荅公遣其人

名摩耳者來乞降又提呂提邦兩部來降飢行省發廩賑之未幾提呂子達量為提索所禽行省給榜招提索

及使釋達量提索聽命二十三年蒙乃土官長子殆昔其鄰境土官弗里皮之婿也蒙乃不以位與長子而與

次子弗里皮與殆昔同出討之朝廷降旨諭弗里皮如得蒙乃地許令其婚統之是歲又征驃甸大部馬二十四年十月木龍蠻奴他謀告阿勒沙村阿加之子明日引軍殺死四村頭目刺些雲南省下麗江路軍民宣撫司明日出見雲南王免其罪是年雲南右丞阿嚕以蒙古軍一千師宗孫勒寸白軍一千農士富民丁三千征維摩蠻者我滅鐵赤必匝尋出降三十年八月雲南省征習普蠻阿浪普龍華札山些賊土官生皆破之火頭輩逃者追普安路管步木普丁府嶠峨頭目矣豆等費榜招出是歲七十城門蠻密察挾仇殺掠大甸土官阿鄰繼遣其弟牟平來侵阿鄰逃入臨安路納樓建水城避之行省不能救又參省阿叔招捕花角蠻恃險率衆拒敵殺令史一人裨將十五人元貞元年九月習普馬兒等犯邊雲南省招出習普肥昌等八若蠻及馬兒部不舊解舊龍二若蠻官的井的探等有必垂豆來者不肯降殺的井從者二人的井等懼不敢出官二年九

月蒙光路軍民總管荅剌吉瓦農開
陽兩寨自來不曾投降雲南省差道努攻破之十一月
車里蠻軍弄興兵占奪甸砦十又三所結構八百媳婦
蠻欲攻倒龍等雲南省遣兵招捕大德元年十二月雲
南省參政呼都拉攻破花角蠻等寨其酋長章郎遁走
初廣南西道宣慰使兼知特磨道事農士富上言安寧
州沈法昔招引唐興州黃夢祥深碎縣林言與花角蠻
圍士富所居殺掠奪虎符執其子信以去又攻其義州
隘岸百姓既而又言夢祥結駐賧州岑聰引歸仁州歸
洛州上降州利州軍四千人燒劫羅佐州官農郎生所
轄那悶村及那寡州南村魯谷村付州那羅村又奪其
那環射隘剥笋羅波射布那哈那等十村行省覘知花
角蠻去特磨四日程安寧州七日程唐興州賧州皆
八日程十月三日呼都拉進討十二月七日過昔陽江
經杜箐九日至花角蠻木韋砦破之十二日攻其正砦
第一門賊敗奪門蓋其砦十二重也十四日分九道進

攻自辰鏖戰節次攻破其門日暮入砦賊散走蠻酋韋郎達不知所在韋郎自國家開拓以來不曾降附至元二十七年阿叔招之不服迎敵官軍失利以此狂縱僭稱大號以妹夫郎滿為平章其餘有萬戶等官至是始敗尋又破其卒羅磨誡獲架哥雅木算等砦招出韋郎達婦翁繼村火頭普及把事希古竹幹哥雅砦火頭郎滿及其弟郎狀郎滿韋郎達之婿也稱韋郎達就陣中傷敗走不知存亡又攻撒都砦其火頭郎圖希古郎甚出降及羅共砦火頭統幹希古都鷄韋郎達弟韋郎動子韋郎應把事希古通幹知幹不弄砦火頭郎勤皆出降移軍攻安寧州沈法昔降移攻夢祥敗之棄砦走七年春永寧路阿永蠻雄挫反初雲南四川陝西湖廣四省會兵討順元羅鬼烏撒烏蒙東川芒部叛雄蠻挫匿順元蛇節賊黨阿嚕及其妻折躬折利并芒部蠻納即弟卧踏事覺遂與把事阿都阿牟等以二月二十一日於赤水河作亂殺永寧府判官常珪行省宣使南嘉台

千戶巴爾蘇爾拒暮暉關三月一日官軍過關蠻拒戰阿都死獲其金褱甲錢子槍賊退走自是連日轉戰自暮暉至普市關九戰殺蠻三百餘破海落越寨二洞阿牟亦死行省以天熱班師扼其魚槽長寧軍梅嶺等關聞于朝以為雄挫東接羅鬼西鄰芒部南近烏撒姻親相結滋蔓力強合以十月初雲南省軍進入暮暉湖廣軍自播州打鼓寨會寧鎮進入蠻地蘭州四川省軍自魚槽長寧進討十一月一日會于赤水河雄挫巢穴從之閏五月軍中遣永寧同知蔡閏行省左右司員外郎實保齊等招雄挫雄挫遣阿加阿抱出降稱病不出又令其屬委界入朝宰相奏雄挫不至乞再伐之雄挫乞以十二月八日徇日出見八年五月赴闕原其罪仍充土官遣還九年羅雄州軍火主阿邦龍少麻納布昌結廣西路豆溫阿匡普安路營主普勒下軍火頭阿只阿為及亦左鄉阿甫等叛燒他羅迷驛左誇軍火主有軍三圜子普安路有軍六圜子降旨招諭仍督兵進討阿邦

龍少拒遠雄山官軍進攻虜阿那勇古荅等阿非阿樓
阿邦龍少子龍豆智降豆溫賊阿匡與弟阿思火頭者
哇亦降連戰敗之獲阿邦龍少追麻納布昌不得十一
年阿迷土官日直火頭抽首領落軍劫焚人奪官馬
以叛又納樓茶甸土官師禾希古阿夷落圭阿立甸必
信怪齒村火頭阿則判村火頭阿提納填村火頭身扣
苴善村火頭阿次虧抽俸村火頭雙茶嵩村火頭咱休
菁笠鄉火頭阿豆加矣傑村火頭阿主矣北村火頭抽
皆床村火頭遮奴元江路日納村火頭个忙忙部火頭
虧抽維摩州土官者歐茅者文大布婆等並起應之官
軍尋皆討定至大元年教合三部步少來龍砦火頭漸
恐等反遣本部達嚕嚕齊阿嚕招諭不服賊黨荅掛殺
阿里官軍破其巢斬漸恐荅掛梟其首延祐七年七月
花角蠻韋郎達糾合五十三村山獠起兵萬餘劫阿用
村呼其人曰爾急來降我即退兵爾之皇帝甚遠我亦
作帝甚近若不降我必爾砦火頭農郎勝等降賊行省

遣官招諭九月永寧路曲村頭目和俄等擅兵劫掠殺渠津州吏目李榮貴奪葭渠州同知勅牒行省遣官招諭至治元年十月八日葭渠州知州刺俄殺其兄刺初癸丑歲刺秋祖刺都降附雲南行省定立州縣令刺秋父刺陶作土官充葭渠州知州後刺秋伯父刺落襲職尋為火頭木落所殺刺落子刺定幼小依其舅子合佳居綿綿村因持刺陶刺落宣命及州印以去刺俄謂已當襲職二次訴于雲南省捕子合刺定不獲刺俄以計誘刺秋赴破寺村潛于道彎弓射之中左目墜馬又斫左額一刀刺秋死俄集衆依摩些俗殺馬牛各一焚刺秋屍明日逼其嫂梳蠻塔為妻及占奪刺秋所部百姓梳蠻塔父刺資來取其女刺俄欲殺之刺資懼逃去栢興府二年正月二十八日刺俄兄刺定自綿綿村與子合起兵奪刺俄刺地和山砦刺俄糾合頭目子首居砦等合兵射死刺定復奪砦本州官往招之刺俄拒砦遙謂曰父祖宣命俱在子合處又藏印不與爾客官行用

我兄弟自相仇殺爭奪山砦不闢爾番漢官事梳蠻塔
係我嫂我殺兄刺定刺扶故以嫂為妻我出官爾欲何
說再三招諭不敢出官行省乞以一千人討之掘密院
不聽咨本省招諭二十年四月馬龍鄉蠻普萬作亂初
普萬父哥祛馬龍他郎甸人也任普日思摩甸長官致
仕長男普奴承廕父子皆居木用村普萬乃次子憤不
得立與哥祛婿抽丑孫婿阿運結蒙古逃軍白夷顧顧
等人攻燒木用甸民獲哥祛逃出普萬殺哥祛弟阿
笠弟子阿占婿可當等劫掠百姓求哥祛欲殺之行省
委官招諭○十二月蒙化州蘭神場落落磨察火頭過
生琮結慶甸蒲火頭阿你通起蒲軍二千五百磨察軍
五百結鎮南州定遠縣當布戶計羅黑加等殺九十九
人虜男女百餘人行省招諭○泰定二年開南州阿都
刺火頭大阿哀引車理陶判孟等萬餘人圍刺砦攻破
十四處木邦路土官八廟等領白衣軍攻破倒入潢砦
朝廷遣幹爾端等持詔招大小車里居里寒賽子尼鴈

構木子刀 大理金齒 至元七年征金齒驃國五部未降
零出降 者破其二部餘三百酋長阿愿福

勒丁阿愿瓜降獻馬象二十四年金齒孟定甸官俺嫂
孟纏甸官阿受夫魯若官木拜共率民二萬五千來降
又林場蒲人阿禮阿憐叔阿郎及阿蒙子雄黑皆為行
省招出阿禮歲承差發鉄鋤六百雄黑布三百疋二十
九年本忽甸土官忽都馬遣其子阿魯進金索鱗膽氈
衣處豹皮詣闕朝見三十年正月遣使持詔詔漆頭金
齒○延祐五年永昌南窩蒲賊阿都衆阿良等作亂燒
劫百姓殺鎮將奪驛馬雲南省遣參政汪申奉右丞多
爾濟討之自八月至明年五月破其寨柵殺人甚衆賊
走入菁阿樓良降餘不可得以天熱回軍其枯柯甸枯
甸慶甸等皆降願歲納貳千索○至治元年七月怒謀
甸主管故侵芒施路魯來等若燒百四十一村殺提控
按牘一人有司奉詔書開讀招諭管故不跪聽亦不出
降二年鎮西路大甸火頭阿吾與三陣作亂奪不領雷

弄二砦初三陣父阿蘭為鎮西總管叛要斬其弟你谷
南赴闕貢獻得襲職你谷南死子斛朶襲位三陣使少
頭倒緬招思二人見解求朶少土地人民不予遂投阿
吾訴之共作亂詔使往諭迎至一樓上樓下周圍懸人
首聽詔畢阿吾怒曰反陣吾孫也吾破不崩寨殺傷甚
衆虜五十人破雷弄甸燒四百餘戶管別砦懼而降我
我遷其民二百五十家于我弟拜法砦中不崩所虜人
其族各以銀三兩贖一人盡贖去訖今官招諭我終不
出亦不受榜所奪地亦不回付須與之相殺南甸路木
甸火頭斛院先奪羅左甸火頭阿賽妻阿衣為妻取之
不肯與又奪阿賽弟莽古妻納衣妻其子阿你阿羅
賽怒使莽古領兵三百遣奪其妻不得燒斛院砦羅羅
斯至元十五年定昌路總管谷納叛遷入八只巴砦為
賊八剌即安古馬楊古剌乞刺蒲等皆應之毀橋梁
取倉粟奪驛馬及屯田車里大德二年三月小車里結
牛明年官軍擊谷斬通車里八百媳婦為亂經時不下

數遣使奉詔招之不聽命延祐三年車里兀竹魯侵阿
尼必得若阿白出麻若燒劫又罕旺及其弟胡念弟愛
俄等侵銀沙羅甸兀里鹽井陪日女具落索等甸劫民
財嚇取官所徵差發使招遣降遣白衣阿愛詐為已子
出官劫掠如故既而愛俄死其兄弟子侄罕塞昭愛刺
搆木力夢兀仲等五人分黨爭愛俄位相殺久之遣火
頭郭力看賁象牙烏撒烏蒙東川芒部大德五年右丞
一金信花一求降劉深奉命征八
百媳婦徵順元遞運人馬土官宋隆濟蛇節等拒命作
亂朝廷起湖廣湖南四川三省兵與田楊二氏軍馬會
雲南省兵收捕于是烏撒土官宣慰使普利總管那由
與東川芒部衆俱叛其接羅羅斯及武定威楚曲靖
仁德普安臨安廣西諸土族皆以朝廷遠征供輸煩勞
為辭攜貳反形已具車里白衣八里日等殺掠普騰江
尾二甸奪麥亢忙龍二砦燒忙陽等二十四砦楊言我
與呂也構思麻部日共議渾侯連漢桑軍來攻普騰砦

柵二月五日梁王出駐陸梁州六日烏撒蠻阿都普信
及烏蒙蠻阿貴阿察都等殺掠皇太后及梁王位下人
畜十一日却芒部官吏商旅貨財烏撒宣慰使僧嘉努
逃入中慶十五日東川土官阿葵烏撒逃來陸梁州依
梁王城阿車阿苗分軍二道欲執宣慰使阿固岱約日
由落吉渡口會阿乃普吉烏蒙軍先攻阿都百姓次攻
逢昌燒烏蒙總管廨舍十七日烏撒蠻犯曲靖益州
燒蕩坦驛殺掠駐兵關渡橋二十日烏撒烏蒙東川馬
湖四族聚衆四千復起羅羅斯軍渡金沙江刻日攻建
昌三月六日賊逼雅州邛部州甚急陝西省遣右丞托
歡禦之八日奉旨伊蘇岱爾充陝西省平章政事汪阿
都齊充參知政事伊蘇呼都魯充湖廣叅政與平章劉
二巴圖等進征叛蠻奇爾濟蘇為湖廣平章與左丞沙
珠岱陝西楊叅政給軍凡有軍事聽伊蘇岱爾劉二巴
圖兩人節制異小有增損軍馬支給錢糧並便宜行事
四月二日那由普利逼烏撒烏蒙宣慰使燕管軍萬戶

阿都合弃城去時陝西調軍二十人會合收捕三百人
守播州小溪以遏烏撒蠻充斥之路雲南省調軍三千
人屯陸梁州五百人駐西曲靖東望水西一千人於霑
益州接烏撒地要害鎮守二千人護中慶而梁王又有
兵五千人劉二巴圖劉深田揚等兵方捕斬順元叛蠻
未能會合伊蘇岱爾與雲南兵共進悉次第討平之

八百媳婦

大德元年八百媳婦國與胡弄攻胡倫又侵
緬國車里告急命雲南省以二千或三千人

往救二年與八百媳婦國為小車里胡弄所誘以兵五
萬與夢胡龍甸土官及大車里胡念之子漢綱爭地相
殺又令其部曲混干以十萬人侵蒙樣等雲南省乞以
二萬人征之四年梁王上言請自討賊朝議調湖廣江
西河南陝西浙江五省軍二萬人命前荆湖占城行省
左丞劉深等率以征既而道經順元土官宋隆濟作亂
道路不通官軍死傷深領軍回不果征至大四年雲南
省言八百媳婦大小車里作亂蒲蠻阿婁銀僭平章都

元帥七十城門土官緬察犯臨安建水普定路土官的
謀害遷調官吏似此蜂起數年不息乞進討朝廷命賚
詔召之皇慶二年雲南省命解難甸達嚕噶齊怕冷哩
鼎等領元招出八百媳婦部曲乃愛乃溫官哀官吾恰
尼哀當吾化兒阿吾阿散阿哀等往其地延祐元年正
月至其境木肯寨其蠻酋渾乞濫妻南貢弄使火頭乃
要弄來迎詔至若立柵圍使者問來故荅之又曰貴來
聖旨有何說使若言宋開讀不敢言俟見渾乞濫言之
乃要還報既又來致南貢弄之言曰使臣有何說可告
我前此使者止至我若即回怕冷哩鼎等不可二月十
三日渾乞濫男南通來見使者言行省先遣胡知事招
爾等爾等遣乃愛等出降故聖旨今遣我輩來詔爾父
子南通曰我等非降也胡知事言爾朝廷地濶軍多故
使家中一二人從胡知事往觀之耳明日南通遣乃要
來言胡知事來時與我衣服鞍馬今爾等所有馬可盡
牽來言訖一與牽去明日又來取去衣服既而渾乞濫

遣火頭南忽來曰可令使臣來見我三月十七日帕哈
哩鼎等至合三砦與渾乞濫相見宣詔明日渾乞濫令
使者送其子南通往孟范甸把邊可就觀我地境使者
不從曰若不觀我地土歸朝何以復命使者從之至孟
范別有生蠻比要與南叔父力乞倫來侵南通言使者
不可不助我使者從南通至木丙山拒敵比要聞有詔
使遂退還至孟范使者欲返南通曰天熱水漲秋涼令
爾回八月終始得出九月四日至渾乞濫若渾乞濫手
書白夷字奏章獻二象令其部曲渾乞濫八番順元諸
渾八剌我董賽愛章關等隨使者起闕
蠻又名一奚不薛至元十五年羅殿國主羅阿察河中
府方番主韋昌盛皆納土來降十六年三月西南八
番等國卧龍番主龍昌寧大龍番主龍延三小龍番主
龍延萬武盛軍番主程延隨過蠻軍番主龍羅篤太平
番主石延異永盛軍番主洪延暢靜海軍盧番主盧延
陵皆來降其部曲有龍丈貌龍章珍黃延顯盧文錦龍

延細延回龍四海龍助法龍才零龍文求等朝廷立八
番宣慰使司司官赴鎮十一月廿一日至新添遣千戶
張旺招羅民國惟賀宗一寨投降餘皆迎敵旺殺散二
十七日至羅崩寨賊又連日與總管王采戰皆披甲戴
紅氍帽采遇害二十九日又戰于大吳十二月一日司
官至番中呼集土番主以四日集卧龍番受宣命至期
俱來惟盧番諸盧延陵為羅氏國主阿察引軍至大吳
西胡迷使趙木納來執去我肯令出降阿察初已納款
後與鬼國結婚鬼國言未降爾奈何先降羅氏遂敗
虎符以叛羅氏又名羅殿事間十七年四川蠻呂告部
主阿濟上言乞招阿察從之既而命南省及雲南四川
進討八月二十九日阿察遣向恠阿麻二人至四川諸
蠻夷部宣慰使司自言無反意但雲南平章聽我仇人
烏鎖納之言織羅我罪朝廷不知我今赴闕聽聖裁雲
南左丞阿魯四川都元帥伊蘇岱爾與南省期以十一
月十五日會一奚卜薛至期南省軍不至阿魯與阿察

欽定四庫全書

卷四十一

戰伊蘇岱爾命萬戶彭天祥雅爾哈特穆爾托歡分三道攻會寧關一奚卜薛遣其部落阿侯拒戰敗逃入山箐亦奚卜薛奔鵬飛砦阿察走大寧阿魯等進兵伊蘇岱爾曰賊已離巢穴今發烏撒播州及南省近地兵足以勦除我等可回不然曠日持久糧乏瘴起不便事聞上命雅爾哈以千人守其地久之賊窮困以二十年二月八日納款二十九年二月一日降詔招懷溪洞蠻夷曰中書省奏金竹知府臬臚言先奉聖旨招諭平伐山齊岩主薩薛約定奪今有居幾地面百眼左阿吉谷各當各迪等自以外荒久欲內附乞頒聖旨庸許自新朕嘉其誠遂俞所奏令諭爾衆咸聽朕言惟爾鄰封率多臣服自番方而入貢尋萬國以來庭南順丹州北懷金竹陳蒙爛土頃已向風新添葛蠻久皆款化咸膺寶命乃佩金符賞賚有加官守如放爾等如能率衆效順同仁一視尚爾迷之或是伊戚之自貽勉思轉禍之言當體好生之意元貞二年六月平伐鄰戒平珠瀘洞砦主

王二原謝難雞公韋巴郎楊義等十八處等官來雲南省告降行省差官入洞撫諭至大德元年四月平珠洞宿家沙家二族賁進呈禮物出洞道經其鄰蠻新添葛蠻宋氏之村頭水底砦宋氏怒二族不由已以降乃遣土都雲長官落冒率衆遮道奪進物二族逃散破劫韋巴郎砦五月宋氏復令平浪巡檢歐陽濯龍與其下大洞李巴林竹哥等率木佬六十餘人劫平珠洞蠻官足萬金婆南大砦柵逼使背雲南之招從已求降不從濯龍掠去足萬金從人足萬雷等及進獻方物此行實招到平林獨山州搖和洞唐開珠羅等處八百四十四砦民五萬餘朝廷立長官司以統之而以蠻婦阿初充長官大德二年四月八番桑柘蠻王二萬馬蟲等叛殺巡檢三萬尋出降馬蟲走他所聚七十餘人陷平包砦圍重輿砦又與叛貓犵佬必際等蠻結連魔槐丫江等處猫人作亂三年命湖廣平章劉某征之四年正月猫桑柘遣所部文何持竹契長力及方物來降潘州宣慰司

欽定四庫全書

卷四十一

以為蠻苟逃禽戮然亦須招安既而黃平府亦上言桑
柘附近之重輿必際都陣犵猪必梅等二十二砦刻契
來降七月桑柘蠻及思官賊梅金匣播州楊金萬必梅
砦主娘報等三百餘砦皆降五年六月八番宣慰司言
党元自降至今八年不供賦役所部娘祖大盤小盤白
定白藥等蠻先結連平伐蠻叛劫先宗砦圍吳卜弄砦
射猫民阿羊金填皆死官軍捕班夏潘家蠻党兀遮道
助其拒敵今年正月又使板橋郎來重陂等砦猫燒劫
百納砦宣慰司令馬上橋金竹府備之且以兵討之党
元年七十九老不能出遣其砦主的勑及子党砦的沙
勇强砦的福三人出降的勑等又與其黨幼鬼砦主陳
醒朱蓋砦主樓地之弟揚八小盤砦主騰香等共誓不
叛至大二年三月八番蠻割和寨主谷陂谷霞砦主洛
驃刺客砦洛卜傍吾狂砦的搗谷浪砦只驗皆降詣闕
三年八番玩西猫蠻阿馬害作亂奏准捕之四年春阿
馬與其降洛羅洛登各替及脅從蠻官卜制頭之子哥

暮出降至治二年六月八番蠻官閉羅陶與其屬十崙
仇殺七月百眼佐等處蠻夷長官司言康佐若主老康
糾合谷聳若主恰信等殺巡檢王忠拘長官洛邦又殺
土官蒙卜郎作亂宣慰司發官兵暨土官敵通往討之
三年正月八番呈周若主韋光正等殺牛立天立盟歸
降自言有地三千九十八若係暢黃五種人氏二萬
一千五百餘房光一等二十三人領
之願歲出土布二千五百疋為租入
宋隆濟大德五年
土官宋隆濟叛初朝廷調廣湖雲南兵二萬征八百媳
婦蠻湖廣兵命左丞劉深等領之取道順元番進入討
入令南雲左丞裕呼萬招達拉哈軍入境調用命新添
葛蠻軍民宣慰司自琅詡驛經平塊蠻峽至順元叢聳
等若糾酌日程分六處安營備餽運丁夫馬匹俟裕呼
萬至點視而雍真葛蠻亦西等部當出丁夫馬百匹五
月二十四日文書至隆濟乃言猫人狔狔謂官欲髡其
髮印記面送軍三四年不返寧死不往雖就若見殺可

也以此觀之夫不可差同官雍真總管府達魯噶齊也里千曰然則起爾宋氏盡行隆濟曰吾往訴之宣慰司遂行六月十七日隆濟構木婁等族作亂其侄臘月宋六分斬斤等告也里千使為備也里千遂避於底窩揚黃砦明日隆濟率臘月弟不奴部家童農斛洛中段刺答洛忙中等納五百人攻楊黃燒砦雍真總管解舍臘月奴都保葛海又來報隆濟以一仇二天與阿昔長官為號糾其同叛又有紫江賊助兵四千破楊黃砦也里千走掠去總管府印殺七里千奴阿麻妻忙葛農等是日龍骨長官阿都麻殺生祭鬼誓眾應隆濟亦謂官拘壯土各負長刀赴亂二十日又脅底窩總管龍郎與古此土阿馬都所部不這羅鬼阿開阿嬌等犵狁抵阿斛砦拒落邦劄佐長官司止十里聲言欲攻劄佐二十一日破底窩砦又欲攻隴兒砦於迷樂橋二十二日自貴州至新添界叢聳陂北至播州界刀項路及卜鄧加鶴鳴

等站皆被突劫又遣中火紫江篤猫脅巡檢倘答鄧同
叛二十七日劫順元毋告之地官校擬進御見尋攻貴
州殺散普定龍里守令軍燒官糧殺張知州七月十日
梁王下令湖廣雲南四川三省會兵誅捕八月雲南平
章綽和爾入順元與賊戰數敗之殺水西水東蠻俱叛
綽和爾遣人招水西土官之妻蛇節不出蠻人洛暮報
云者阿泡言蛇節已反統青衣破軍圍貴州甚急又有
三家猫箐蠻坐草敵官軍敗之十一月詔敵宋隆濟妄
說驚擾事端糾合蛇節及羅鬼酋酋長阿合女仇相扇作
亂特遣湖廣行省平章政事劉二巴圖指揮使額森呼
都魯率兵及思播宣慰賽音布哈等土兵與四川雲南
省分道並進別勅梁王提兵進討悔罪來歸者復其官
爵能殺賊酋或禽獻者賞執迷不悛勦除一切事宜並
從劉二巴圖等區處十五日隆濟黨校曲旁等攻貴州
綽和爾掠得阿容者言始因徵征八百媳婦人夫馬匹
亦奚卜薛之子步曰人馬不辦官鎖其項步曰恥忿與

隆濟議糾合阿八阿納許波泥帖等反烏撒總管那由
言爾兵若破貴州鴨池之事容易我將圖之遣其族阿
雄阿行頭佐助兵行省令土官普利買馬助軍普利稱
軍馬價不用貳非金不可觀望不肯道是月土官烏犀
叛行省討之敗走祿豐砦劫梁王位財貳六年正月官
軍以隆濟九次攻圍貴州糧盡退還賊邀于花猫牛場
二箐及長脚木獐截萬溪山沙木南箐鉄門關沙樹猫
北箐殺傷甚衆掠去行裝文卷○江頭江尾和泥等二
十四砦龍馮蹄一十八村皆叛二月一日四川宣慰使
汪惟勤與湖廣平章會兵播州三月六日至打鼓砦南
木瓜琪遇賊阿訛敗之九月十九日劉平章使土官俠
者潛刺殺阿泡蛇節駐兵折刺危水以待官軍十月十
七日劉平章殺敗蛇節乘船遁去陝西兵殺敗芒部叛
蠻鬼旺納濟等與雲南湖廣軍合過泊飛關追蛇節七
年正月二十六日劉平章至阿加砦追及蛇節二月一
日出降其黨曲捧阿暮等四十餘人皆出三月三日領

軍自必加迴程奉旨斬蛇節蛇節初叛地名廣西兩江
蹉尋禽斬隆濟惟金竹賊月下卜蘭木逃去
至元十三年知來安軍李惟屏知來安軍兼知涑州事
岑從義降十五年田州上隆州下隆州武隆州兼州黃
漢棧思恩州八中溫潤砦頻洞計洞淶洞在洞上下雷
洞上下影洞皆降十七年廣州海港賊霍公明蘇俄細
麥嬰上等害招討馬應麟捕斬之○大德七年四月藤
州大任洞賊黃德寧殺人牛犬祭兵僭號造妖言劫掠
偽稱皇帝李龍神定國公皇佐丞相黃德寧立國公皇
羅榮開國飛童黃京夫主朝化民衛主黃汝妙六部尚
書潘國用六按尚書潘昱玉精光祿大夫兼管生民殿
前太尉彭元吉殿前引兵斬斫使莫道名都統幹太師
黃勸賊設醺筵門首橫寫大字牌曰建慶賀新君登極
太平道場醺筵呼萬歲又曰願我皇帝早登九五之位
四月九日以黑漆木椅作亭屋持兵張旗幟鳴金鼓至
巫烈山迎李龍神進銀慶賀德寧家有大字黃紙位牌

寫上祝新君李萬歲其曉民榜示曰照會穹庭發下寶
物付李皇帝掌握日後統九五之位運半千之慶緣一
六國皆已統成一天今李皇編排得力得衛主差一十
九司及府額六百十四軍州七十餘縣後安天之日命
令衣冠圭簡靴帽殺活杖玉璽計七事給付李皇掌管
今十分之民七分不信三分頻信五月輕差兵卒收不
信中民一千之數尚慮累及信民今發曉民榜一道付
右蠻衙晚示信民至日兵馬行令有誥者免罪無誥者
定行誅戮王印朱文預先曉示故榜並令知悉九年四
月日榜封民倉帖云逆民禾倉定公封龍神又名萬頃
德寧與父璋信先曾叛逆出降有司謂其三代為寇六
次叛伏今不可赦尋習捕獲伏誅八年都窩洞賊叛至
大二年常豐洞蠻大弟什用糾集洗王不鬼散毛等洞
蠻劫掠永寧之阿那禾砦延祐二年靖江古縣羅蠻洞
徭賊劫掠燒架閣庫文卷縱獄囚四年招出徭人趙仙
十七潘仙等殺獲石倉團侯重用及秀秀嶺頭團白團

提江團淋背團頡豚團等賊重用能祭雷雨通陰陽七年十一月左州黃郎君劫掠淶查村至治元年太平路賊趙郎陳叛屯粘村二年廣西宣慰使燕牽言淫族非一生于深山窮谷者謂之生猺野處巢居刀耕火種採山射獸以資口腹標槍藥弩動輒殺人其雜處近民者曰熟猺稍知生理亦不出賦又有撞猺則號為兵官守隘通道于官有用自宋象州王太守始募熟猺官供田牛以供此役至今因之為今之計莫若置熟猺與撞猺並為撞戶分黃聖許至元二十九年閏六月知上思州地遏賊為便黃聖許反聚二萬人斷道路結援交趾借兵攻邕州遣副樞密程鵬討之聖許戰敗率三十人逃入交趾既而復至邊地攻劫三十一年同知兩江宣慰司事楊烏爾圖上言能不用兵招降聖許從之八月聖許劫幫團長山隘又與交趾興道王結婚未幾詔赦罪許自新行省差烏爾圖赴賊黃合巢內開讀聖許經一月亦不出復以二萬人討之時賊屯上思州那

峇柵三忒柵細良柵石佛柵那結柵那次柵等若揚烏
爾圖上言聖許兩招不出三月七日令子志寶同大小
頭目一千餘人來言聖許曾對天陳誓不肯出官費到
降狀稱揚烏爾圖費聖旨來招豈不欣悅望北謝恩外
聖許雖有誓不出願情投降當令兒孫頭目出官聖許
還本州招集逃戶復業行省以聖許不出依前進討三
月十九日聖許生日坐草房正廳紫羅盤領衫裏布金
帶據銀交椅直上懸朱漆金字闕碑參賀人二呼萬歲
明年正月聖許駐上牙六羅茅山林既而兵敗自斃半
山走交趾亨村晚夢久之間官軍回復還由旁村至峙
細潛居官軍約十月一日會合進討聖許敗獲其妻女
大德元年二月五日聖許遣其子志寶賫狀赴廣西兩
江道宣慰司出而赴闕尋詔聖許朝京師聖許不肯挾
志寶走交趾萬寧寨志寶不聽逃回訴于官六年聖許
復回故地居鳳凰舊巢攻圍諾屯仙洞屯既而又使人
來告降且乞還其所虜之妾朝廷羈縻之延祐元年正

月聖許陷忠州殺黃知州等六年聖許族人黃萬山萬
松壽攻古能村戈村劫殺歸龍團皮零洞至治三年聖
許婿黃縣官攻劫邕州渠岑氏至元十八年鎮安州鎮
樂墟百姓逃避于鬱團撫岑毅反與特磨道農
士貴書曰設有達達軍馬來起差稅吾與爾皆一家之
人團裹戰殺實不願作大元百姓於是放兵攻劫殺順
安知州李顯祖掠其小妻家財官軍討之出降大德十
一年左江來安路總管洞兵萬戶岑雄作亂殺其侄世
傑延祐七年來安總管岑世興反十二月十七日燒田
州上林縣那齊村明年二月殺懷德知州凌順武奪州
印又攻那帶縣世興尋出降稱洞溪事體與內郡不同
自唐宋互相仇殺並不曾殺官軍侵省地廣西道又上
言世興嘗殺兼州知州黃克思播至元十四年六月思
仁分食其尸世興雄之子也州思景賢播州楊邦
憲兩安撫使降邦憲在宋為牙牌節度使正任安遠軍
承宣使左金吾衛上將軍知播州事御前雄威將軍都

統制紹慶珍州南平安撫使節制屯駐鎮戍軍馬朝廷授以龍虎衛上將軍侍衛親軍都指揮使紹慶珍州南平等處沿邊宣撫使兼播州管内安撫使佩虎符十六年春官軍平思州杜望杜暮河土茶林諸砦圍桐木龍竹既而犵獠伯同叛陷合水美岳二砦至大元年七月思州言廣利白拿等處苗賊與公俄羊溪苗賊作亂伏白泥站劫人三年獨山州土官蒙天童款附蒙朝廷設獨山州窖洞木洞都雲等五處軍民司令天童乞往招本州毗鄰未附者黎坡上團九黎九姓黎苟王刺南郭文下都雲等一千九百餘砦平伐生苗主只王等不在其數行省從之招到平填三間地酋長羅宋備桑根地砦主蘆桑吳各解陳蒙爛土蠻官天程牙男天程孫等桑林獨力長官亞浪男洛磨界牌猫砦主乞把上爛土砦主陳爛虫下爛土砦劉國圍麻乃砦主猫的傍谷記砦主猫青珪等以刀槍鹽馬來獻延祐四年洛磨反初招附時洛磨稱病遣其子各里及大砦主都罷落能等

赴省既而同降者楊銀延訴各里非其子乃奴子各午也至是侵水手浪等處至治二年四月播州上言招降

洞蠻北心砦官盧崩信備大晏大關砦王安吉力上洛磨砦羅散水洞入砦官黎上錢廝亮大小荅架砦官黎

桑皮歪盧海北海南至元二十八年瓊州安撫使陳仲客錢等達上言乞招生熟二黎降旨許之

招到本州生黎大踢小踢端趙麻山等四洞王氏平等出降皇慶二年黎賊王奴歐等反偽稱平章元帥立國

設官焚劫百姓三年正月奴歐等降刻箭誓不復亂使之歸業然羅襖等處兵未散延祐二年十二月二十三

日黎盜百餘人入橫州永淳縣殺達魯噶齊礫死民義村傷縣尉走賓州古辣村至治元年九月黎賊犯茶洞

燒民居二年七月黎人王火燒劫獄奪去又陷南偏洞砦殺焚毳甘佛龍彭瘦等火燒劫獄奪去又陷南偏洞砦殺焚

采廣東至元二十年九月廣東黎德區將軍聚十萬人等改元僭號殺居民陷城邑又增城縣蔡大老鍾

大老唐大老皆應之據平康下里東團村等處官軍破之區將軍走藍營官軍追燒之延祐三年三月德慶路徭蠻叛既而令山主五世祿山主李伯達招降圓麻山徭人盤郎梗盤古綴王窮賜等出官至治二年徭人何窮賜陀窮賜等降出月徭江西至元十四年四月江戲馮岳護犯新會縣西通社江西至元十四年四月江稱天下都大元帥刻都帥印又立為天從廣德皇帝設銅將軍鐵將軍等號五月沙縣賊謝五十自稱擎天將軍尋皆平定十七年南康都昌縣杜可用反號杜聖人偽改萬乘元年自稱天王民間皆事天差變現火輪天王國王皇帝以譚天麟為副天王都昌西山寺僧為國師朝廷史弼討敗之命江西招討方文禽可用元貞二年七月贛州興國縣龍坑民劉六十名季撰妖言張偽榜及劉季天旗自稱劉王刻皇漢高祖廣新之帝并行王二印設朝殿開行省置丞相左右丞將軍軍頭等官宣言止殺官中人與張大老作亂八月攻吉州永豐遣

江西省左丞董士選討之十月捕獲六十自裁不死伏
誅延祐二年四月贛州寧都州蔡五九反與其黨聚鬼
子寮五王廟殺猪置酒俱執錫撈槍刀五九自號洞主
六月五九率衆劫掠村落郡邑殺寧都州趙同知圍寧
都州燒四關八月三日官軍開門與戰賊退五九自稱
蔡王騎馬列儀衛張漢高祖造戰棚砲架攻具其勢甚
張又犯福建地奏遣兵討之九月江浙江西省會兵
至石城縣弓兵宋伏成於鬼子寮木麻坑禽五九伏誅
福建至元十六年五月降旨招閩地八十四畬未降者
十七年八月陳桂龍父子反漳州據山砦桂龍在
九層際畬陳弔眼在漳蒲峯山砦陳三官水篆畬羅半
天梅龍長窖陳大婦客寮畬餘不盡錄十八年十月官
軍討桂龍方元帥守上饒完者都屯中饒時桂龍衆尚
萬餘拒三饒尋捕得其父子斬之南劍州丘細春反行
鎮國開國大王改元昌泰二十年八月建寧招討使黃
華反集亡命十餘萬剪髮文面號陀頭軍據政和縣十

月詔史弼高興劉二拔都巴延將兵討浙東至元二十
之與福建呼拉楚會合華敗自焚死
台州仙居縣有王仙人者言今年五星朝斗天崩地陷
合有聖人出招立大將置寨黃都南溪氏陳再一等從
之為亂敗自焚其屋赴火死二十六年二月台州寧海
人楊鎮龍反據玉山縣二十五都偽稱大興國皇帝置
其黨厲某為右丞相樓蒙才左丞相以黃牌書其所居
門曰大興國改安定元年乘黑轎黃絹轎罩黃傘得良
民刺額為大興國軍四字二月一日殺馬祭天受偽天
符舉事蒙才等拜呼萬歲有兵十二萬七萬攻東陽義
烏餘攻嵎縣新昌天台永康宗王玘吉判持浙東宣慰使
史弼討之鎮龍陷東陽縣尋禽誅獲其二印一皇帝恭
膺天命之寶一護國護湖北大德五年閏八月懷德府
民威權法令奉命之印麻用南木達結權生蠻摸
狃狃于麻用州界立砦殺掠田六十什家劫辛苦村
洞主仰闕驢家皇慶二年十一月靖州青符團石榴山

蠻吳干道作亂尋降延祐元年沅州胡老鼠獠賊作亂
三月招出其黨蒲狗尚金朝李部凱至甕省砦出官七
年六月慈利州貞家山居民貞公結懷德府河者洞驢
合什用謝甲洞巨仙什用恩石洞沒爾什用安俱洞重
達義等侵湖南招至元十五年全州教授唐子定奉府檄
白水泉界團屋孫耶林水團門客耶師哥罵耶專田團
中降沽油團屋孫耶龍堂團近師耶壬哥羅勾猗猛口
喉無米耶喉社勾耶龍堂團近師耶壬哥羅勾猗猛口
團客多耶小池團祖女耶穿弟傘匠耶等共二十餘團
此獠人居深山窮谷巢穴中不巾不裳赤脚露脰衣用
牛羊血點白布作青花逐幅相體湊成無領袖耕山地
種豆薯蕷產楮皮厚朴大德二年郴州可大老叛官軍
殺其劉尊長王寨司等四川至元十四年五月降旨付
又有黃公爹者亦反四川至元十四年五月降旨付
順使招思州田景賢瀘州可南番蠻王阿永叙州筠連
騰串豕鷩昔霞等處諸族蠻夷十五年叙州剥骨蠻殺

使者十七年六月施州市備大盤散毛等洞溪納款十
九年發都掌阿永等民為兵征荅馬刺都掌等上言宋
時未嘗僉軍乞以馬牛助軍需從之未幾征亦奚卜薛
起軍酋長阿峻等亦不從命二十二年正月討降又巴
聳農洞諸蠻三十年十月西川行樞密院奉詔征鐵州
茂州汝州西番蠻夷其殺戮降下者必力溪等十五砦
其砦主曰牛特○蛇必○烏麥○蒲雪韋吠○舍具○
得輸○只禪○非曰○東非○勾巴等也其未府而堂
征者西番螳磨○鵬成○獨秦罷○強獐徽垓○顏蘇
○五則○客客昔多○坡必立○兀刺○新而元○立
山等也○六年陝西平章伊蘇岱爾奉命進兵討順元
羅鬼烏撒烏蒙東川芒部叛蠻九月伊蘇岱爾自叙州
慶符直衝矣娘州烏嚴叅政阿都齊自長寧直衝芒部
降下十八九回軍就糧至永寧阿永蠻雄挫反雄挫藏
八番反蠻蛇節部曲阿罔及其妻折躬折利及芒部納
即弟卧踏故於七年二月二十八日反於赤水河伊蘇

低爾就討之射死阿都奪其金裹甲鎧子搶九戰得出
叛境閏五月雄挫妻蘇池與招降官蔡閏文字一紙畧
曰阿具阿卑賈得榜文為我住在山箐別無同伴蠻官
我自來不管官事順元結連諸夷作亂差人邀我同叛
我雖是親戚斷不曾聽信又言聽得羿子殺訖使臣不
是蠻官本情我親去單洛具與衆蠻官報知然後出來
軍中再令閏往招雄挫六月遣阿加阿抱持文字來大
意謂我不反使臣貪婪所致十四日雄挫遣牌頭阿底
下夷人阿大遮文字降陝西省右丞而稱病不出但令
永寧路同知阿況之子委界赴官蓋其叔父也又與必
能阿模同行朝廷必欲令雄挫入朝移文行省不出則
進討十一月雄坐呈擇二十四日起程續又呈再擇十
二月初三日狗日出部二十四日到魯槽與其部曲阿
他及把事頭目各者末末等二十九人赴京都賞衣服
弓矢鞍轡放回至大元年三月大弟什用集洗王不鬼
散毛等洞兵侵者等洞既而出降遣墨施什用答旻什

用赴闕五月歸州巴東縣唐伯圭言十七洞之衆惟容
米洞罔告洞抽攔洞有壯士兵一千餘皆不足懼也皆
官軍討之可分四道其一自紅鈔寨直趨容米○玩珍
○昧惹○卸加○阿惹○石驢等洞其一從苦竹砦抵
桑厨○上桑厨○抽攔洞其一由紹慶至孛摩○大科
○陽蔓師○大翁迦洞其一徵又巴洞問十萬大帝什
用洞兵接應如此可平至治二年散毛洞蠻大望什用
劫掠黔江縣五里荒三年五月順元洪番安撫劫掠卜
哥所管砦民銅西番至元四年五月崇慶等處從宜王
鼓牛犢等物遇等令已降西番人大番官旁未
及阿里吉招到西番大和尚解設○三卜魯大蒙○答
谷族思蓬怯○將同族速恭麻○拘牢族鮮酌等共十
一族七年從宜府遣投降番官額和尚招到遠番和尚
石本雜○汝鳳川番官獨然棚入朝二十三年陣骨族
六彪及其子合彪結犢單族條竹族寇脫思麻路敗之
二十六年疊州西番人朶兒只牙思招到生番心抄等

八族降至大三年二月雲南省蒙光路土官解罕上言
有第三瀾在西天界藍塞守邊大德八年三瀾來言西
天地僻不知是何達達軍馬奪數砦而去今年正月三
瀾復遣火頭官兜來言西天使來又有達達軍馬殺西
天王而立其孫奪其堡寨所乘馬甚高大蹲伏乃可羈
鞍問此彊之外其主者誰西天王對白衣所居歸屬大
元為民出賦久矣遂出大箭三金段一使致信於白衣
曰我得之地我為主在爾之地爾自主之無相侵奪今
來使以其箭與金段授三瀾毋攬陶有此邊警不敗不
報事聞朝廷命雲南省體探提備施行至治元年土蕃
宣慰司呈孔提谷充兒等七族番賊阿城弟蒙者等伏
五盧平林內殺傷官軍又昌東○着思巴○八郎篤公
○參卜郎○赤珊○阿八○必只刺等東西萬里俱
係生番其八郎朶公劫朶兒只八站馬二百餘匹
遼

陽威古特

至元十年征東招討使達希喇呈前以海勢風
浪難渡征伐不到盛音濟喇敏威古特等地去

年征行至尼魯罕地間得烏登額人約蘇稱欲征威古特必聚兵候冬月色克小海渡結凍冰上方可前去先征岱音濟喇敏方到威古特界云云大德二年正月招討司上言濟喇敏人百戶哈芬○博和哩○等先逃往內和屯與叛人結連投順威古特作耗奉旨招之千戶已雅斯以為哈芬等已反不可招遂止大德元年五月威古特賊沃梭乘濟喇敏所造黃窩兒船過海至哲哩木蓄子作亂八月濟喇敏人諾木齊過海至烏色砦遇內和屯人言濟喇敏人雅奇扎木稱威古特賊與博和哩等欲以今年比海凍過果幹虜掠打鷹人乞討之既而遼陽省咨三月五日濟喇敏百戶烏坤濟等來歸給魚糧網扇存恤位坐移文管沃濟濟喇敏萬戶府收管六月五日官軍敗賊於錫喇和屯七月八日威古特賊王博凌古自果幹過海入佛哩河官軍敗之九年六月濟喇敏人吉爾庫報威古特賊奴納木喀等官軍追之不及過扎爾瑪河劫掠至大元年濟喇敏百戶奇徹奇納言威古特約索努呼欲降

達達哈扎薩至尼魯罕又濟喇敏人多神努額齊訥來
言約索努呼沃梭等乞降持刀甲與頭目布結結且言每
年貢異皮以夏間達喇

圓明和尚

延祐七年六月十三
日夜奉元蓋厓縣終

布魚出時回還云云
南景谷小高山僧圓明和尚就扶風小員大家糾合蘇
子榮等五十餘人各執桑木笏持二劍祀星斗偽即位
為皇帝衆呼萬歲圓明和尚者姓白名唐古台年三十
七耀州美原縣特默齊軍延祐七年四月小高山湫池
邊建禪菴誦經尋移其母馮閏娥與弟廣師皆來菴中
蓋厓人來燒香者受戒牒因與子榮等相識至是誠以
七月五日攻奉元路舉事其徒言普覺長老和尚上元
甲子合坐大位六月二十九日扶風縣人告變官軍捕
之唐台提劍夜二更欲出山走官軍圍之遂相射難
鳴時復回菴中七月一日陝西省參政多爾濟巴勒史中
奉以兵捕賊唐古台藏其母林中與妻妙師及其黨西
循秦嶺走久之棄偽印章草內又無糧唐古台與妙師

藏林中令人下山探伺消息八月五日午時唐古台困
睡官軍追及執妙師等唐古台脫走九日奉元路達魯
噶齊巴延于白楊平河禽唐古台伏誅○招捕事不
止此是惟取其人名地名及事與序相干者入注中

軍制

世祖即祚建官位事侍衛則有左右前後中諸衛衛設
親軍都指揮使外此則萬戶之下置總管千戶之下置
總把百戶之下置彈壓總以樞密院皇太子兼樞密使
節制天下兵方面有警則置行樞密院事已則廢而移
都鎮撫司屬行省命長官一二人領之萬戶千戶百戶

分上中下萬戶佩金虎符符趺為伏虎形首為明珠而有三珠二珠一珠之別千戶金符百戶銀符萬戶千戶死陣者子孫襲爵死病則降一等總把百戶老死萬戶遷他官皆不得襲是法尋廢今無大小皆世其官獨以罪去者否號部伍曰翼百戶而下繇散兵官本翼則免其家為卒他翼者不免千戶而上雖本翼仍不免幕官久次積階至四品得為千戶而軍士則初有蒙古軍特默齊軍蒙古軍皆國人特默齊則諸部族也其法家有

男子十五以上七十以下無衆寡盡科為軍有事則空營帳而出十人為一牌設牌頭上馬則備戰鬪下馬則屯聚牧養孩幼稍長又籍之曰漸丁軍既平中原發民為卒曰漢軍或以貧富為甲乙戶出一人曰獨戶軍合二三而出一人則一為正軍戶餘為貼軍戶或以男丁論嘗以二十丁出一卒至元七年十丁出一卒又或以戶論二十戶出一卒而限年二十以上者充士卒之家為富商大賈則又取一人曰餘丁軍至十五年免或取

匠為軍或取諸侯將校子弟充軍曰質子軍又曰圖噲
哈軍皆多事之際一時之制天下既平嘗為軍者定入
尺籍伍符不可更易詐增損丁產者覺則更籍其實而
以印印之病死戍所者百日外役次丁丁少者再予五
十日死陣者復一年貧不能役則聚而一之曰合併貧
甚者老無子者落其籍戶絕者別以民補之奴得縱自
便者俾為其主貼軍逃而還者復三年又逃者杖之投
他役者還籍中醫而良者奏復其房其土田則初視民

輸半租既而蠲四頃曰贍軍地餘田賦如常法既得宋兵號新附軍大率蒙古軍特點齊軍戍中原漢軍戍南土亦間厠新附軍諸國人之勇悍者聚為親軍宿衛而以其人名曰欽察衛喀喇衛阿速衛唐古衛內外卒皆以時踐更又有遼東之紂軍契丹軍女直軍高麗軍雲南之寸白軍福建之畚軍則皆不出戍他方蓋鄉兵也又有以技名者曰砲軍弩軍水手軍應募而集者曰達勒哈軍此不給糧餉不入帳籍俾為游兵助聲勢虜掠

以為利者也其名數則憲宗二年之籍至元八年之籍
十一年之籍而新附軍有二十七年之籍非有旨雖典
掌者不敢擅發亦不得閱其數軍出征戍家在鄉里曰
與魯州縣長官結銜兼鄂羅官以蒞之此其槩也事之
見簿書者具諸左方

軍器

是編載兵器而附軍需之料例名物具工典此其給納
之事也至元初命統軍司造兵壞則諸萬戶行營選匠

自修之則內有武備等積貯列郡設雜造局歲以鎧仗
上供其精者有西域礮摺疊弩皆前世所未聞軍需則

糧鈔衣帽靴袴至製燧馬馬蹄澁魚網斧鑣鴛鏤渾

脫之類是也

太宗四年十戶辦軍衣十套每套四件帽
錦襖綿袴靴○軍器有十五稍九稍七稍

五稍三稍砲至元二年令統軍造司兵器或修補則各
萬戶軍中選匠置局自治之四年上都李仲成造靴車
神鳳弩射八百餘步六年教頭李初言乞造軍器教士
卒武藝奉旨各色內上造一真者餘以木為之○軍需
有馬脚澁披檀夾袋火鑊木枕絆布帳鉄櫪鉄觀斧鎌
柳編子柳觀檀帳鉄鑪鉄鴛鏤鉄簞籬渾脫鉄於十一
年造絮四石斗力桂子弩二石斗力三十年取江浙省
紙信砲皇慶元年新附軍甲仗收于本萬戶封置有調

遣則給
與之

教習

陣有奇正人有坐作兵有擊刺必耳金鼓目旗幟千萬
夫如一人則始可用矣神元上世北戴斗極以立國寓
兵法於獵開闔聚散嚴矣及取天下四征不庭水陸之
師莫不教練故能東西討伐所向無前承平既久愈益
不廢諸將麾下悉設教首勸賞情罰皆有著令今載其
見于簿書者使後有考焉陣圖戰藝秘不示衆

整點

天子新即位則分遣樞密院臣僚乘傳行諸省洎列郡
考戎將所典之士壯若懦校其籍之數觀馬肥若瘠與
兵之利鈍甲冑鞍盾之堅脆發箠弓矢旗幟之新弊什
物之備否大閱行賞罰還奏吏文曰整點一則以受圖
膺籙之初振舉庶政而武事其一一則以警動天下耳
目而備不虞此常制也餘則或有征伐亦閱所當遣卒
於期會啟行之方或外本兵者廢革而藩方新有其軍

必覈實齊一之或受任者急於事而往作其弛墮皆整
點如上今雜載之第是數者非得旨皆不敢行

功賞

賞典軍中要事也其有戰守功登賞者皆已隨事附載
見於事者則或已過時追念其功而賞或索數功而總
議行賞或泛以征伐勞苦而有所賜予或興土木之役
畢事而犒之或遣使整閱天下兵還奏恪慎效職而遷
擢者也自世祖已前則簿書闕焉

責罰

國家用兵行師數矣責罰之見於纂述者甚少蓋因事致罰者各隨其事而見此所錄率多雜罪如賞典云

宿衛

屬橐鞬列宮禁曰宿衛軍國有大朝會徧徵諸侯王入京師之歲所司設廬發環大內士晝夜居其中以備非常既朝會則罷之曰宿衛軍皇帝祀郊廟幸佛寺蹕街清道曰儀仗軍從幸畿甸曰扈從軍坐帑藏倉庾譏問

出入搖鐸警夜以護天子之良貨賄曰看守軍皇帝幸上都從留守大臣以夜鐘時出譙樓下分行國中衢陌察盜賊至曉曰巡邏軍歲漕由海至沽水口輸海津倉五方人全集惡少不逞游警其間出千人彈壓曰鎮遏軍如上雜載一卷舉一以附其餘曰宿衛類云

屯戍

國初征伐駐兵不常其地視山川險易事機變化而位置之前却進退無定制及天下平命宗王將兵鎮邊徼

襟喉之地

如和林雲南回輝和爾河西遼東揚州之類

而以蒙古軍屯河洛

山東據天下腹心漢軍特默齊軍戍淮江之南以盡南海而新附軍亦間厠焉蒙古軍即營以家餘軍歲時踐更皆有成法獨南三行省不時請移彼置此樞密院必以為初下南時世祖命巴延阿珠安塔海阿爾哈雅阿勒哈與阿爾婁博羅輩所議定六十三處兵也不可妄動奏卻之此其槩也

工役

軍之役土木者率以築都城皇城建郊廟社稷宮殿籍
田官府寺舍倉庾治道築堤堰牐壩造橋梁開漕河大
祭祀掃除壇壝之類餘則建佛寺起塔樹幡竿修寺僧
之水碾為大臣築第拽碑石與伐船材斫葦被城上理
鹿圈黃羊圈百人五十人則樞密院指撓過是則奏間
亦給傭直洎糧然第畿內事也外郡則惟修甘州城且
建倉浚咸平府清寇河之游理寧夏浮圖一百又八而
已

存恤

國家恤軍士至矣然吏予奪之際亦有文致刻者朝廷忠厚久亦悉釐正之虞其飢賜之糧餉寒給之衣歲荒振其妻子由戰戍歸道中有司續食病者療之不幸而死于鈔二十又五貫曰墳塋錢將校倍之使藁殯行營旁俟其同鄉縣人為卒更代得歸者命負置骸骨其家不既至矣乎始定制卒之陣死者復其家一年病死者半年傷而扶還以斃者比病死樞密院以為戰而傷還

死營壘中異屯居告終枕席亦昇復一年又卒以月朔
旦受糧不幸病死自死至月末盡日之食曰破月糧有
司復徵入倉廩或病時已賣糧為資用則取償其火五
人糧曰措除逃去者亦僂指其日徵之如上法在位者
婁上言非便乞無多寡盡賜以買棺又官吏病滿告百
日報罷其破月俸米過其月五日者亦仍給之又其比
也事下版曹執舊比不變廟堂不聽卒免遠戍病死者
破月糧而逃者徵如故不既忠厚乎

至元十五年八月
樞密院議陣亡軍

欽定四庫全書

元文類
卷四十一

七

存恤一年病死者存恤半年若臨陣攻戰被傷還營致死難同屯居病亡合從陣亡例存恤至治元年六月龍興副萬戶王武德言廣東身死軍追指支過月請鹽糧非便甘肅行省亦嘗言開除軍士照筭身死在逃月日食用不盡鹽糧却於見在軍內就有虧見役軍人又南安路總管管府判官牟規上言病故軍悶下或十日或半月鹽糧拘收還官不便乞今後無問多寡盡給為買棺之用似望死生不致失所令南雄路戍軍李真湛灼等自本月初九日十一日以後身死官司俱將已支各軍破月鹽糧作門下數目於下月實在軍糧內扣除伏覲首部定例諸官吏患病百日作闕支過俸米除全月回納還官外據支過破月俸鈔如已過當月初五日非屬破月糧數免徵都首送戶部謝身死及逃軍拋下米糧擬合拘收還官如無令所管頭目陪納已施行依上施行訖都首以所擬未當再下本部邊遠戍軍病故支過口糧既已費用若令扣除陪納若失優愍之意擬合

免徵次月隨即開除却不得因時虛椿
捏合冒破官糧仍令肅政廉訪司體察

兵雜錄

兵雜錄者其所以錄之意義見總序此其事

馬政

國朝肇基朔方地大以邊橐駝馬羊牛不可以限量而
數計今牧馬之地東越耽羅北踰和林圖們西至甘肅
南暨雲南凡二十四所又大都上都以及諤尼巴雅爾哲
里木齊達勒地周迴萬里莫非監牧之野在朝置太僕寺

典御馬及供宗廟影堂山陵祭祀與玉食之捫乳馬之
在民間者有抽分之制數及百者取一及三十者亦取
一殺乎此則免牛羊亦然其抽分之地凡十有五或遇
征戍及邊圉乏馬則和市拘括以應倉卒之用非常制

也悉類以述于茲

太僕寺典御馬左股烙官印號大印于馬其印有兵古貶古濶卜川月思

古幹樂寺名產騎即烙太廟祀事及諸寺影堂用乳酪則供北馬駕伏及宮人出入則供尚乘馬供上反諸王百官捫乳取黑馬乳以奉玉食謂之細乳諸王百官者謂之粗乳又自世祖皇帝而下山陵各有醢都取乳以供祀事號金陵擠馬盡三年以與中山陵者拈分羊馬太宗時家有牛羊馬及百者取牧牛羊馬各一頭入官

牧馬牧牛牧羊及十頭者亦各取一頭入官定宗時諸人牛羊馬羣十取其一隱者有罪憲宗時百取其一成宗時每年七八月間委人賞聖旨來驛赴所該州縣與民官眼同抽分十月分赴者交紬宣徽院羣上及百下及三十者抽分貢不及三十者免共十五處虎北口南口駱駝嶺白馬甸遷民鎮紫荊關丁寧口鐵門關軍源口沙靜忙安倉庫坊興和等處遼陽等處察罕諾爾又世祖時不許販馬過南界黃河以南潼關之東直至斷縣非官中人不得騎馬皆令賣之於官中仍禁拽車拽碾及耕地

屯田

國家平中原下江南遇堅城大敵曠日不能下則因兵屯田耕且戰為居久計當時無文籍以誌制度之詳不

可考既一海內舉行不廢內則樞密院各衛皆隨營地
立屯軍食悉仰足焉外則行省州郡亦以便利置屯甘
肅瓜沙河南之勺陂洪澤皆因古制以盡地利雲南八
番海南海北本非立屯之地欲因之置軍旅於蠻夷腹
心以控扼之也其和林陝西四川等或以地所宜或以
邊計慮至周密法甚美矣其置立之由增損之制收穫
之數賞罰之規悉具左方

樞密院所轄

左衛屯東安州永清縣軍二千田一千三百一十頃有零實耕一千頃餘地立營司

場院廬舍牛二千○右衛屯永清縣霸州益津縣餘同
左○中衛屯香河武清寶坻餘同○前衛屯霸州涿雄三
州益津文安新城○後衛屯永清霸州○武衛屯保定
之定興霸州涿州軍三千田十頃牛四千○左翼屯會
川縣滄清二州置屯田萬戶有軍二千田一千三百九
十九頃牛一千六百○右翼大都之武清保定之新城
一千五百人田六百九十九頃田在郭雄二州牛三百
七十○忠翊侍衛屯大同之平地朔州之馬邑一千人
二千頃滑州靜海七百人六百五十六頃○龍翊侍衛
屯文安八百人三百頃○左衛率府屯武清三千人千
五百頃○宗仁衛屯薊州大寧路上金山二司農司所
轄永平屯馬城三千二百九十戶牛三千六百六十頭
輶田一萬一千六百頃○營田提舉司武清二千一百
餘戶田三千五百頃牛三千六百○廣濟署屯滄州宣
一千二百二十戶牛三千二百田一萬二千六百頃

徽院所轄

淮東淮西屯淮安州塔山徐郢沂一萬一千七百

戶田一萬五千二百頃牛三千二百六十六○豐閏署
屯薊之豐閏縣八百三十戶田三百五十頃○寶坻屯

寶坻縣三百戶田四百五十頃○尚珍腹裏所轄大同
署屯宛州四百五十戶九千七百頃屯儲

府大同山陰縣九千九百人田五千頃○虎賁司屯上
都置司典松州分司軍三千佃戶七十九戶田四千二

百嶺北省屯

稱海五條河四十六遼陽所管大寧路海
百戶六千四百頃陽屯遼馬

鎮置司瑞州之西瀕海置屯一百三十戶二百二十七
頃○浦峪路屯刺憐置司四百九十戶田四百頃○金

復州屯本路置司忻都察立屯三千六百戶二千五百
頃○肇州屯蒙古女直屯戶六百五十戶田一千五百

項河南南陽民地

六屯六千戶田一萬六千六百頃牛四千
○洪澤淮安之白水塘黃家疇一萬

六十戶田三萬五千三百頃○勺陂安豐之安豐縣屯戶一萬四千○德安屯浮城畝豆陂環河磨山省港篙子港潭陂澤河港陂李陂十屯屯戶九陝西屯鳳翔鎮千三百軍五千九百田八千八百頃

涇陽彭原安西平涼終南渭南共七千五百戶田五千八百頃○陝西萬戶府屯盤屋之孝子村張馬村杏園

莊亞拍鎮寧州之大昌原德順州之威戎二千六百戶田八百一十頃○桂齊延安屯二千戶田四百八十頃

甘肅寧夏屯

西安州置司塔里里置屯二千三百戶田一千四百九十頃○肅沙瓜三州屯甘州

置司黑山滿峪泉水渠鴨子翅屯屯二千二百九十戶田一千一百六十頃○寧夏營田司屯棗園納怜站唐

來渠尾立屯二千一百戶田一千八百頃○寧夏官屯鳴沙州置司九百戶田四百四十頃○額濟訥屯合即

渠置司二百戶田九十一頃

江西西安砦兵屯

贛之龍南安遠五龍相鄉田處三千二百

戶田五百
二十四頃
江浙省汀漳屯
汀之上抗漳之漳浦軍
高麗

屯東寧府鳳州等十
雲南威楚提舉司屯
三十三戶田
屯每屯五百人
一百六十五

雙○大理金齒屯軍六百戶民三千七百戶田二萬二
千一百五雙○鶴慶路屯軍一百五十二戶民百戶田

一千雙○威楚軍民屯軍三百九十九戶民一千一百
戶田七千一百雙○武定路屯一百八十戶田七百四

十八雙○中慶軍民屯軍七百九十九戶民四千一百戶田
二萬二千五百雙○曲靖屯曲靖江仁德三路立屯

萬一千戶田九千雙○烏撒屯軍百十戶民八十六戶
○臨安路屯建水州立屯二千四百八十戶田五十一

百雙○烏蒙屯軍七百戶田三千七百八十雙梁千戶
屯立於烏蒙○羅羅斯屯會通建昌會川德昌立屯四

百七十戶○烏蒙屯軍四川廣元路屯八十七戶田九
五千田千二百五十頃○叙州屯長寧軍富順

州立屯四千四百戶○紹慶路屯九十一戶○嘉定路
屯十二戶○順慶路屯五千戶潼川屯一千四百戶○
夔路屯五千戶○重慶路屯三千五百戶○成都路屯
五百十戶○保寧軍屯一千一百十八頃○叙
州軍屯宣化縣隔口左屯二百戶田四十一頃○重慶
五路萬戶府屯三堆中槽趙市立屯千二百戶田四百
廿頃○夔路萬戶府屯崇慶州箕箕莊遂寧州北渠立
屯三百五十戶田五十六頃○成都萬戶翼屯崇慶州
義興鄉楠木園立屯二百五十戶田四十二頃○河東
陝西萬戶府屯灌州之青城陶壩崇慶之大柵頭千三
百戶田二百八頃○廣安萬戶府屯慶之七寶壩立屯
百五十戶田廿六頃○保寧萬戶府屯崇慶州晉源縣
之金馬五百六十戶田七十五頃○叙州萬戶府屯青
城二百二十戶田三十八頃○五路萬戶府屯崇慶之
大柵鎮孝感縣灌之青城縣之懷仁鄉千二百戶田二
百三頃○興元金州萬戶府屯晉源之孝感鄉三百四

十戶田五十六頃○隨路八萬戶府屯灌之青城溫江
縣八百三十戶田百六十頃○舊附萬戶府屯青城崇
慶一千戶田百廿九頃○砲手萬戶府屯青城縣龍池
鄉九十戶田十六頃○順慶軍屯晉源之義興鄉江源
之將軍橋五百六十戶田九十八頃○平陽軍屯青城
大柵三百九戶田六十九頃○順慶萬戶府軍屯漢初
白土子平六百五十戶田一百一十四頃○廣湖廣海
安萬戶屯新明立屯雷百一十戶田二十頃○海
屯瓊高化廉雷州立屯八十三戶田五百六十頃○廣
西兩江撞兵屯上浪忠那御雷畱水口藤州四千九百
戶田六百四十○御州屯衡陽之青化永州之
烏符武崗之倉立屯千五百戶田三百一十頃

驛傳

國家驛傳之制有府寺

通政院兵部北
克托和斯站官

有符節

圓牌聖
旨札子

有次舍有供頓

馬車牛驢狗驍

驛傳之在漢地者兵部領之在

北地者涖以通政院郡邑之都會道路之要衝則設托克托和斯之官以檢使客防姦非驛各有主者以典其事此其府事使者銜密命以出或急速不能待有司文移則典瑞院徑自御前出金字圓符付之即佩以行次有銀字者以常事遣則省部給御寶聖旨水行者給船劄此其符節驛中有堂有室有庖湍兩驛相距道修則道半別置官舍以憩號邀驛此其次舍使者宿驛中則給

米泔酒各一升麪泔肉各一斤曰全飧不宿而過者給半飧冬之炭夏之冰雨之製備馬僕從予米他不給陸行馬微者或給驢閩廣馬少或代以牛水行舟山行轎倦者給卧轎綱運以車馬直險則丁夫負荷遼海以犬曳小輿載使者行冰上此其供頓其馬舟車之數視官崇卑事大小為多寡民之役驛中者復其地四頃不輸租與兵士同然出馬供使客馬死輒買補之有正馬副馬或久而貧不能為役別取可者代之使者不得枉道

行杖館人擇善馬囊橐重不勝載非警急而疾馳馬致斃者皆有罪此又其事之大槩也進奏之郎在京師者

曰會同館而綱運則號陸運提舉司云

太宗時制使臣日支肉一斤麪

一斤米一升酒一瓶十一年十月奉旨驛傳勿給懷駒馬如違給者乘者各杖五十七使臣無急事令乘牛車中統三年奏西京等路鋪馬疲勞擬令押運官坐車騎驢奉旨今後隨路車運官物止令押運官坐車乘驢不須給馬四年中書省定例使臣十月一日至正月三十日日支炭五斤五年八月中書省奏站戶田限四頃免稅以供鋪馬祇應已上地畝全納地稅至元二年中書兵刑部上言渾源弘州不曾立站順天真定德興等路使臣背道徑行索換鋪馬中書省行下各處今後使臣止由正站走遞毋得經行不立驛站之處換馬○中統

元年令和木哈總管諸路札木齊至元元年改革漢站令各路管民官掌管和木哈提領使臣起數鋪馬強弱至元七年十一月立諸站都統領使司使臣非急務則乘牛驢事速則馳驛八年中書省議鋪馬劄子用蒙古字各站未能盡識仰繪畫馬尺錢小印於劄子年月日之後就左右司以墨印印馬數復以省印覆之墨印左右司封掌二十六年二月十六日沿海鎮守官蔡澤言泉州至杭州陸路甚遠外國進貢方物勞民負荷驛馬多死澤知海道舊有三千水軍合於海道立水站遞運免勞百姓又可戢盜尚書省奏從之名曰海站後罷元貞元年六月九日丞相諤勒哲奏哈勒巴地界舊立狗站十二所前者當站糧食出於百姓然其地不事耕稼數年以來站狗多死至站無以交換又赴前站轉致損乏站戶苦之每戶乞振鈔十定聞其俗用青珠宜相兼與之

奉旨
准奏

弓手

中統五年驗郡邑民衆寡置馬步弓手夜遊邏禁人出
違者有罪皆以防盜也而京師南北兩兵馬司各至千
人郡邑相拒遠村落有邸舍可居停者亦置之每百戶
取中產者一人以充盜發期一月獲不獲期兩月三月
一不獲則笞之至再至三則笞加多官有綱運若流徒
者至則執兵仗導從以轉相授受外此則不敢役示專
其求盜職也

中統五年設馬步弓手驗民戶多少置額
其夜禁之法一更三點鐘聲定禁人行五

更三點鐘聲動聽人行有公事急速喪病產育之類不拘此違者笞二十七下有官者七下贖州縣相離遠處其間五七十里所有村店及二十戶以上者設巡防弓手闕津渡口食設之處不在五七十里之限百戶內取中戶一名捕盜官領之有盜則立三限盤捉每限一月一限不獲強盜一十七下竊盜七下兩限強二十七竊十七三限強三十七竊二十七限內獲一半者免罪中都設巡馬侍衛親軍內差四百名至元八年御史臺呈除捕盜防轉外不得差占十六年南城設一千四百名北城七百九十五人今定制南兵馬指揮使司一千名西北關廂巡檢使三十人南關廂巡檢使二十七人北兵馬指揮使司一千人東關廂巡檢司十八人畿內共五十二所二千八百九十九人上都二十四所六百六十人兵馬指揮使司二百二人

急遞鋪

轉送朝廷及方面及郡邑文書往來十里或十五里二十五里設一急遞鋪十鋪設一郵長鋪設卒五人文書至則紀於厯視早晏標至時於封因以絹囊貯而版夾之又裹以小漆絹卒腰革帶帶懸鈴手槍挾襖襖費文書以行夜則持火炬焉道狹車馬者負荷者聞鈴則遙避諸旁夜亦以驚虎狼不苦又響及所之鋪則鋪人出以俟其至囊版以護文書不破碎不襞積摺小漆絹襖襖以禦雨雪不濡濕槍以備不虞所之鋪得之又展轉

以去定制一晝夜走四百里郵長治其稽滯者郡邑官
復督察加詳焉而勤儉有賞罰京師則設總急遞鋪提
領所秩九品銅印官三員又有號牌鎖匣印帖長引隔

眼之法可謂密矣

世祖庚申四月大都東北西三道立一百鋪鋪兵一千一十八戶北道左

院花園至云州赤城四十二鋪每鋪十里東道大興縣
臘八莊至薊州蘆兒嶺四十鋪二百人西道宛平縣通
玄闕至涿州澤畔鋪十八鋪百一十四人又立開平至
京兆鋪中統元年五月令隨處官司直接鄰境兩界安
置至本路宣撫司宣撫司直接至朝省鋪每鋪丁五人
縣官置簿付鋪遇有文字至即注名件到鋪時刻傳遞
人姓名又置簿令轉送人取下鋪押字交收時刻還鋪
本縣時復照刷稽滯者治罪與文書縣官以絹袋封記

以牌書號牌長五寸濶一寸五分綠油黃字書號邊闊
急速公遣用匣子封鎖於上重別題號及寫某處文字
發遣時刻其匣長一尺濶四寸高三寸黑油紅字書號
以千字文為號傳遞文字須管一時辰內傳遞三鋪燕
京宣德已北寧鋪十里計行二十里燕京宣德已南二
十五里一鋪一時行一鋪計二十五里二年四月禁不
得私自夾帶一毫物件轉送七月以傳遞文字損壞遺
棄委州縣未織投調行月就鋪照押其歷設鋪司一名
堂歷提調官不治事初犯再犯贖三犯笞八年二月以
文字磨擦遺失令文字到鋪裏以軟絹包袱又以油絹
卷縛夾版束繫賣小回歷一本到鋪交割附歷訖於回
歷上令鋪司驗到鋪時刻并文字角數及有無開折損
壞仍一晝夜走四百里鋪中什物十二時輪子二枚鋪
歷遇夜常明燈鋪兵各備夾版鈴攀纓槍絹包袱油絹
簑衣回歷九年左補闕祖立福合言急者速也急遞名
不佳宜改奉旨令老成人議之中書令翰林國史院議

更爲通遠鋪不果行二年二月以轉送文字不分緩急一緊遲滯令急者州油單羊皮表布裏青囊盛之一晝夜行五百里其餘用油單羊皮表布裏白囊盛晝夜四百里尋改絹表布裏三十一年設大都總急遞鋪提領所九品銅印提領三員大德四年和林宣慰司言本處係蒙古草地無處轉遞文書令使臣順帶至治三年以反匿損破公文有失設法兵部謹每十鋪設郵長一人於州縣籍破記司吏內差充一歲交承兩州縣相交接之處鋪多者差相等者近年輪差使之專督其事於所管鋪分往來巡視務要修置亭舍什物宗備附寫鋪歷分白依程式走遞文字從始官司量地遠近印帖長引隔眼於上明白票寫件數發行日時至各各郵長去處標寫發於轉遞上下半月具遞過文字夜各日時申提調官依期親歷刷整點署押文案報廉訪司照刷各鋪稽滯損失文字或附寫不明不實郵長不能盡職提調官罪須互相舉呈上司行移究治郵長不能盡職提調官罪

之三犯者罷仍去州縣籍記姓名一歲之內克盡乃役畧無稽違者即從優先補

祇從

祇從之徒出入訶喝左右指使者也總以首領副以面前猶古首面也從在京諸司者給食錢而省六部樞密院御史臺者積勞得除征官外郡者免其雜徭役腹內地取於輸四兩包銀戶南方則以徵稅至米三石之家充是皆庶人之在官者也其額視官府崇卑事務煩簡而多寡之出額冒居逐去又有守狴犴防囚徒者曰禁

子追呼保任逮捕者曰伊喇附馬

鷹房捕獵

國制自御位及諸王皆有實保齊蓋鷹人也及一天下
又設捕獵戶皆俾致鮮食以薦宗廟供天庖齒革羽毛
以備用而立制加詳地有禁取有時違者罪之冬春之
交天子或親幸近郊縱鷹隼搏擊以為游豫之度曰飛
放故類鷹房捕獵四卷夫獵殺事也而列聖之仁政存
其間殺胎者有禁殺卵者有禁歲饑而盜獵禁地者赦

至皇慶間有司奏出幸時至我仁廟以穀不熟民困曰
朕不飛放且勅諸王位實保齊皆不聽出嗚呼萬世之

下其求法之哉

乙未年曾奉皇帝聖旨籍打捕鷹房戶屬御位及諸王公主駙馬置打捕鷹房

官今義辦鷹鵠鵠入宣徽院生料庫雜翎入武備寺瀟
新活鴈鴨進入太廟神厨局拾皮入利用監鷹隼戶進
鷹雉雞尾供光天大明諸殿及影堂憲宗五年正月奉
旨正月至六月盡懷羔野物勿殺唯狼不以何時而見
殺之無妨違者奪聽乘馬及衣服弓矢以賞見而言者
見而不言者亦同罪又喻諸打飛禽人先帝聖旨有卵
飛禽勿捕之今後鷹房人春月飛禽勿殺違者治罪中
統三年十月有旨依舊例中都四面各五百里地內除
打捕人戶依年例合納皮貨野物打捕外不以何人不
得飛放打捕雞兔違者治罪又奉旨北口白馬甸南口

三道集團獵違者籍沒一半家產斷罪仍遷其鄉於真定之南籍沒物賞告人惟狼熊虎狐金錢豹可殺景州之東二百里外平樂州西南海邊易州之北及武清寶坻霸州保定東安州亦禁易州之南不禁至元二十六
年十二月二十八日奏擅州禁地內劉得成殺食野物雖已詞伏緣其因饑闕食違禁殺死出不得已其家有牛二十頭若依例籍沒何以為生奉旨免之明年房山民亦以饑犯禁依前例奏免之皇慶元年正月內參議中書省事圖魯哈特穆爾阿爾哈雅等奏飛放之時至矣丞相特穆德爾今臣等奏取聖裁上曰今年田禾多不收百姓饑困朕不飛放一年九月奉旨腹懷地今年田禾災傷諸位下母令實保齊已爾齊前供

元文類卷四十一